

妙諦法音

法句譬喻經

法句譬喻經

①	無常品	4
②	教學品	12
③	多聞品	19
④	篤信品	27
⑤	戒慎品	30
⑥	惟念品	31
⑦	慈仁品	34
⑧	言語品	38
⑨	雙要品	40
⑩	放逸品	48
⑪	心意品	50
⑫	花香品	51

⑬	愚闇品	58
⑭	明哲品	63
⑮	羅漢品	69
⑯	述千品	71
⑰	惡行品	79
⑱	刀仗品	84
⑲	老耄品	89
⑳	愛身品	93
㉑	世俗品	96
㉒	述佛品	99
㉓	安寧品	100
㉔	好喜品	105
㉕	忿怒品	107
㉖	塵垢品	110

②7	奉持品	112
②8	道行品	114
②9	廣衍品	117
③0	地獄品	119
③1	象品	125
③2	愛欲品	130
③3	利養品	142
③4	沙門品	145
③5	梵志品	146
③6	泥洹品	149
③7	生死品	151
③8	道利品	154
③9	吉祥品	165

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

法句譬喻經

① 無常品

※昔者，天帝釋五德離身，自知命盡，當下生世間，在陶作家受驢胞胎。

何謂五德？①身上光滅，②頭上花萎，③不樂本坐，④腋下汗臭，⑤塵土著身。

以此五事，自知福盡，甚大愁憂。自念三界之中，濟人苦厄，唯有佛耳。於是，奔馳往到佛所。

時，佛在耆闍崛山石室中，坐禪入普濟三昧。

天帝見佛，稽首作禮伏地，至心三自歸命佛法聖眾。

未起之間，其命忽盡，便至陶家驢母腹中作子。

時，驢自解，走瓦坯間，破壞坯器。其主打之，尋時傷胎。其神即還入故身中，五德還備，復為天帝。

佛三昧覺。讚言：善哉！天帝能於殞命之際，歸命三尊。罪對已畢，不更勤苦。

爾時，世尊以偈頌曰：

所行非常 謂興衰法 夫生輒死 此滅為樂

譬如陶家 埏埴作器 一切要壞 人命亦然

帝釋聞偈，知無常之要，達罪福之變，解興衰之本，遵寂滅之行。

歡喜奉受，得須陀洹道。

※昔，佛在舍衛國精舍中，為諸天人龍鬼說法。

時，國王波斯匿大夫人，年過九十，卒得重病，醫藥不瘥，遂便喪亡。

王及國臣，如法葬送，遷神墳墓。葬送畢訖，還過佛所，脫服跣屣，前禮佛足。

佛命令坐。而問之曰：王所從來，衣粗形異，何所施為也？

王稽首曰：國大夫人，年過九十，間得重病，奄便喪亡。遣送靈柩，遷葬墳墓，今始來還，過覲聖尊。

佛告王曰：自古至今，大畏有四：生則老枯，病無光澤，死則神去，親屬別離。是謂為四，不與人期。萬物無常，難得久居，一日過去。人命亦然，如五河流，晝夜無息，人命駛疾，亦復如是。

於是，世尊即說偈言：

如河駛流 往而不返 人命如是 逝者不還

佛告大王：世皆有是，無長存者，皆當歸死，無有脫者。

往昔國王、諸佛真人、五通仙士，亦皆過去，無能住者。空為悲感，以殞軀形。

夫為孝子，哀愍亡者，為福為德，以歸流之。福祐往追，如餉遠人。

佛說是時，王及群臣莫不歡喜，忘憂除患。諸來一切，皆得道跡。

※昔，佛在羅閱祇竹園中，與諸弟子入城受請。說法畢訖，晡時出城。

道逢一人，驅大群牛，牧還入城，肥飽跳騰，轉相舐觸。

於是，世尊即說偈言：

譬人操杖 行牧食牛 老死猶然 亦養命去

千百非一 族姓男女 貯聚財產 無不衰喪

生者日夜 命自攻削 壽之消盡 如滌霏水

佛到竹林，洗足卻坐。阿難即前，稽首問言：世尊！向者道中說此三偈，不審其義。願蒙開化。

佛告阿難：汝見有人驅牧群牛不？

唯然，見之。

佛告阿難：此屠家群牛，本有千頭，屠家日日遣人出城，求好水草，養令肥長，擇取肥者日牽殺之。殺之過半，而餘者不覺，方相舐觸，跳騰鳴吼。傷其無知，故說偈耳。

佛語阿難：何但此牛！世人亦爾。計於吾我，不知非常。饕餮五欲，養育其身。快心極意，更相殘賊。無常宿對，卒至無期。朦然不覺，何異於此也！時，坐中有貪養比丘二百人，聞法自勵，逮六神通，得阿羅漢。

眾坐悲喜，為佛作禮。

※昔，佛在舍衛國祇樹給孤獨園，為諸弟子說法。

時，有梵志女，年十四五，端正聰辯，父甚憐愛。卒得重病，即便喪亡。田有熟麥，為野火所燒。梵志得此憂惱愁憤，失意恍惚，譬如狂人，不能自解。

傳聞人說「佛為大聖、天人之師，演說經道，忘憂除患。」

於是，梵志往到佛所，作禮，長跪。白佛言：素少子息，唯有一女。愛以忘憂，卒得重病，捨我喪亡。天性悼愍，情不自勝。惟願，世尊！垂神開化，釋我憂結。

佛告梵志：世有四事不可得久。何謂為四？①有常，必無常。②富貴，必貧賤。③合會，必別離。④強健，必當死。

於是，世尊即說偈言：

常者皆盡 高者亦墮 合會有離 生者有死

梵志聞偈，心即開解，願作比丘。鬚髮自墮，即成比丘。重惟非常，得阿羅漢道。

※昔，佛在羅閱祇耆闍崛山中。

時，城內有姪女人，名曰蓮花。姿容端正，國中無雙。大臣子弟莫不尋敬。爾時，蓮花善心自生，欲棄世事作比丘尼。即詣山中，就到佛所。

未至，中道有流泉水，蓮花飲水澡手，自見面像，容色紅輝，頭髮紺青，形貌方正，挺特無比。心自悔曰：人生於世，形體如此。云何自棄，行作沙門？宜當順時，快我私情。念已，便還。

佛知蓮花，應當化度。化作一婦人，端正絕世，復勝蓮花數千萬倍，尋路逆來。

蓮花見之，心甚愛敬。即問化人：從何所來？夫主兒子父兄中外皆在何許？云何獨行而無侍從？

化人答言：從城中來，欲還歸家。雖不相識，寧可共還，到泉水上坐息共語不？

蓮花言：善。

二人相將，還到水上，陳意委曲。

化人睡來，枕蓮花膝眠。須臾之頃，忽然命絕，臃脹臭爛，腹潰蟲出，齒落髮墮，肢體解散。

蓮花見之，心大驚怖：云何好人，忽便無常？此人尚爾，我豈久存？故當詣佛，精進學道。

即至佛所，五體投地。作禮已訖，具以所見向佛說之。

佛告蓮花：人有四事不可恃怙。何謂為四？①少壯，會當歸老。②強健，會當歸死。③六親聚歡娛樂，會當別離。④財寶積聚，要當分散。

於是，世尊即說偈言：

老則色衰	壯病自壞	形敗腐朽	命終其然
------	------	------	------

是身何用	恆漏臭處	為病所困	有老死患
------	------	------	------

嗜欲自恣	非法是增	不見聞變	壽命無常
------	------	------	------

非有子恃	亦非父兄	為死所迫	無親可怙
------	------	------	------

蓮花聞法，欣然解釋。觀身如化，命不久停，唯有道德泥洹永安。

即前白佛：願為比丘尼。

佛言：善哉！

頭髮自墮，即成比丘尼。思惟正觀，即得阿羅漢。

諸在坐者聞佛所說，莫不歡喜。

※昔，佛在王舍城竹園中說法。

時，有梵志兄弟四人，各得五通。卻後七日，皆當命盡。

自共議言：五通之力，反覆天地、手捫日月、移山住流，靡所不能。寧當不能避此死對？

一人言：吾入大海，上不出現、下不至底，正處其中。無常殺鬼安知我處？

一人言：吾入須彌山中，還合其表，令無際現。無常殺鬼安知吾處？

一人言：吾當輕舉，隱虛空中。無常殺鬼安知吾處？

一人言：吾當藏入大市之中。無常殺鬼趣得一人，何必求吾也？

四人議訖，相將辭王：吾等壽算，餘有七日。今欲逃命，冀當得脫，還乃觀省，惟願進德。

於是別去，各到所在。七日期滿，各以命終，猶果熟落。

市監白王：有一梵志，卒死市中。

王乃悟曰：四人避對，一人已死。其餘三人，豈得獨免？

王即嚴駕往至佛所，作禮卻坐。王白佛言：近有梵志兄弟四人，各獲五通，自知命盡，皆共避之。不審今者，能得脫不？

佛告大王：人有四事不可得離。何謂為四？①在中陰中，不得不受生。②已生，不得不受老。③已老，不得不受病。④已病，不得不受死。

於是，世尊即說偈言：

非空非海中 非入山石間 無有地方所 脫之不受死

是務是吾作 當作令致是 人為此躁擾 履踐老死憂

知此能自靜 如是見生盡 比丘厭魔兵 從生死得度

王聞佛言。歎曰：善哉！誠如尊教。四人避對，一人已死，祿命有分，餘復然矣。

群臣從官莫不信受。

② 教學品

※昔，佛在舍衛國祇樹精舍。

佛告諸比丘：當勤修道，除棄陰蓋，心明神定，可免眾苦。

有一比丘，志不明達。飽食入室，閉房靜眠。愛身快意，不觀非常，冥冥懈怠，無復晝夜。卻後七日，其命將終。佛愍傷之，懼墮惡道。即入其室，彈指覺曰：

咄起何為寐 螭螺蚌蠹類 隱蔽以不淨 迷惑計為身

焉有被斫瘡 心如嬰病痛 遘于眾厄難 而反為用眠

思而不放逸 為仁學仁跡 從是無有憂 常念自滅意

正見覺務增 是為世間明 所生福千倍 終不墮惡道

比丘聞偈，即便驚寤。見佛親誨，加敬悚息。即起稽首，為佛作禮。

佛告比丘：汝寧自識本宿命不？

比丘對曰：陰蓋所覆，實不自識也。

佛告比丘：昔，維衛佛時，汝曾出家，貪身利養，不念經戒，飽食卻眠，不念非常。命終魂神生螭蟲中，積五萬歲。壽盡復為螺蚌之蟲、樹中蠹蟲，各五

萬歲。此四品蟲生長冥中，貪身愛命，樂處幽隱，以冥為家，不喜光明。一眠之時，百歲乃覺，纏綿罪網，不求出要。今始罪畢，得為沙門，如何睡眠不知厭足？

於是，比丘重聞宿緣，慚怖自責。五蓋雲除，即得阿羅漢。

※昔，佛在舍衛國祇樹給孤獨園，與諸天人四輩說法。

時，有一年少比丘，為人頑愚，質直疏野，未解道要。

情意興盛，思想於欲，陽氣隆盛，不能自制。以此為惱，不獲度世。

坐自思惟：有根斷者，然後清淨，可得道跡。

即至檀越家，從之借斧，還房閉戶，脫去衣服，坐木板上，欲自斫陰：正坐此陰，令我勤苦，經歷生死無央數劫，三塗六趣皆由色欲。不斷此者，無緣得道。

佛知其意，愚癡乃爾。道從制心，心是根源。不知當死，自害墮罪，長受苦痛。

於是，世尊往入其房。即問比丘：欲作何等？

放斧著衣，禮佛自陳：學道日久，未解法門，每坐禪定，垂當得道，為欲所蓋，陽氣隆盛，意惑日冥，不覺天地。諦自責念，事皆由此，是以借斧，欲斷制之。

佛告比丘：卿何愚癡，不解道理！欲求道者，先斷其癡，然後制心。心者，善惡之根源。欲斷根者，先制其心。心定意解，然後得道。

於是，世尊即說偈言：

學先斷母 率君二臣 廢諸營從 是上道人

佛告比丘：十二因緣，以癡為本。癡者，眾罪之源。智者，眾行之本。先當斷癡，然後意定。佛說是已。

比丘慚愧，即自責言：我為愚癡，迷惑來久，不解古典，使如此耳。今佛所說，甚為妙哉！

內思正定，安般守意，制心伏情，杜閉諸欲，即得定意。在於佛前，逮得應真。

※昔，佛在羅閱祇國靈鷲山中，為諸天人國王大臣說甘露法。

有一比丘，剛猛勇健。佛知其意，遣至山後，鬼神谷中，令樹下坐。數息求定，知息長短，安般守意，斷求滅苦，可得泥洹。

比丘受教，往至谷中欲坐定意。但聞山中鬼神語聲，不見其形，但有音聲。悚息怖懼，不能自寧，意欲悔還，即自念言：居家，大富宗族。又，強復出家學道，獨見安處鬼神深山。既無伴侶，又無行人，但有諸鬼數來怖人。思惟如是，未去之間。於是，世尊往到其邊，坐一樹下。而問之曰：汝獨在此，將無怖懼耶？

比丘稽首，白言：初未曾入山，在此實憂。

須臾之間，有一野象王來，倚一樹臥。心獨歡喜，遠離諸象，一何快哉！佛知象意，告比丘曰：汝寧知是象，所由來不？

對曰：不審。

佛告比丘：此象眷屬，大小五百餘頭。厭患小象，捨來至此，倚樹而臥。自念得離恩愛牢獄，一何快哉！象是畜生，猶思閑靜。況汝捨家，欲求度世，方以獨自，欲求伴侶？愚冥伴侶，多所傷敗。獨住無對，亦無謀議。寧獨修道，

不用愚伴。

於是，世尊即說偈言：

學無朋類 不得善友 寧獨守善 不與愚偕

樂戒學行 奚用伴為 獨善無憂 如空野象

佛說是時。比丘意解，內思聖教，即得應真。谷中鬼神，亦皆聞解，為佛弟子，受誓誡敕，不復侵民。

佛與比丘共還精舍。

※昔，佛在舍衛國祇桓精舍，為諸天人宣演經法。

時，羅閱祇國有二新學比丘，欲往見佛。二國中間，曠無人民。于時旱熱，泉水枯竭。二人飢渴，熱喝呼吸。故泉之中有升餘水，而有細蟲，不可得飲。

二人相對曰：故從遠來，欲望見佛。不圖今日，沒命於此也。

一人言曰：且當飲水，以濟吾命，進前見佛，焉知其餘也。

一人答曰：佛之明戒，仁慈為首，殘生自活，見佛無益。寧守戒而死，不犯戒而生也。

一人即起，極意快飲，於是進路。

一人不飲，遂致殞命，即生第二忉利天上。

思惟自省，即識宿命：持戒不犯，今來生此。信哉福報，其不遠矣。

即持花香，下到佛所，為佛作禮，卻住一面。

其飲水者，道路疲頓，經日乃達，見佛神德，至尊巍巍，稽首禮畢，涕泣自陳：我伴一人，於彼命終，感其不達，願佛知之。

佛言：吾已明矣。

佛以手指曰：今此天人，則汝伴也。全戒生天，又先至矣。

於是，世尊披胸示之：汝觀我形，不奉我戒，雖云見我，我不見汝也。去我萬里，奉行經戒，此人則為在我目前。

於是，世尊即說偈言：

學而多聞	持戒不失	兩世見譽	所願者得
學而寡聞	持戒不完	兩世受痛	喪其本願
夫學有二	常親多聞	安諦解義	雖困不耶

於是，比丘聞偈慚怖，稽首悔過，默思所行。
天人聞偈，心意欣悅，逮得法眼。天人眾會，莫不奉行。

③ 多聞品

※昔，舍衛國有一貧家，夫婦慳惡，不信道德。

佛愍其愚，現為貧凡沙門，詣門分衛。

時，夫不在。其婦罵詈，無有道理。

沙門語曰：吾為道士，乞丐自居，不得罵詈。唯望一食耳。

主人婦曰：若汝立死，食尚叵得。況今平健，欲望我食？但稽留時節，不如早去。

於是，沙門住立其前，戴眼杼氣，便現死相。身體臃脹，鼻口蟲出，腹潰腸爛，不淨流漫。

其婦見此，恐怖失聲，棄而捨走。

於是，道人忽然捨去。去舍數里，坐樹下息。

其夫來歸。道中見婦，怪其驚怖。其婦語夫：有一沙門，見怖如此。

夫大瞋怒，問「為所在」。

婦曰：已去，想亦未遠。

夫即執弓帶刀，尋跡往逐，張弓拔刀，奔走直前，欲斫道人。

道人即化作琉璃小城，以自圍遶。

其人繞城數匝，不能得入。即問道人：何不開門？

道人曰：欲使開門，棄汝弓刀。

其人自念：當隨其語。若當得入，手拳加之。

尋棄弓刀，門故不開。復語道人：已棄弓刀，門何不開？

道人曰：吾使汝棄心中惡意弓刀耳，非謂手中弓刀也。

於是，其人心驚體悸：道人神聖，乃知我心。

即便叩頭悔過，稽首道人。曰：我有弊妻不識真人，使我興惡。願小垂慈，

莫便見捨。今欲將來，勸令修道。

即起還歸。其妻問曰：沙門所在？

其夫具說神變之德：今者在彼。卿自宜往，改悔滅罪。

於是，夫妻至道人所，五體悔過，願為弟子。長跪問曰：道人神變，聖達乃爾。有琉璃城，堅固難踰。志明意定，永無憂患。行何道德，致此神妙？

道人答曰：吾博學無厭，奉法不懈，精進持戒，慧不放逸。緣是得道，自致泥洹。

於是，道人因說偈言：

多聞能持故 奉法為垣牆 精進難踰毀 從是戒慧成

多聞令志明 已明智慧增 智則博解義 見義行法安

多聞能除憂 能以定為歡 善說甘露法 自致得泥洹

聞為知法律 解疑亦見正 從聞捨非法 行到不死處

道人說偈已。現佛光相，洪暉赫奕，照曜天地。

夫妻驚愕，精神戰懼，改惡洗心，頭腦打地，壞二十億惡，得須陀洹道。

※昔，佛在拘睢尼國美音精舍，與諸四輩廣說大法。

有一梵志道士，智博通達，眾經備舉，無事不貫。貢高自譽，天下無比。求敵而行，無敢應者。晝日執炬，行城市中。

人問之曰：何以晝日執炬而行？

梵志答曰：世皆愚冥，目無所見。是以執炬，以照之耳。觀察世間，無敢言者。

佛知梵志宿福應度，而行貢高，求勝名譽。不計無常，自恃憍恣，如是當墮太山地獄，無央數劫求出甚難。

佛即化作一賢者，居肆上坐。即呼梵志：何為作此？

梵志答曰：以眾人冥，晝夜不見明，故執炬火而照之耳。

賢者重問梵志：經中有四明法，為知之不？

對曰：不審。何謂四明法？

①明於天文地理，和調四時。②明於星宿，分別五行。③明於治國，綏化有方。④明於將兵，固而無失。卿為梵志，有此四明法以不？

梵志慚愧，棄炬叉手，有不及心。

佛知其意。即還復身，光明炳然，晃照天地。便持梵聲，為梵志說偈言：

若多少有聞 自大以憍人 是如盲執燭 照彼不自明

佛說偈已。告梵志曰：冥中之甚，無過於汝。晝而執炬，行入大國，如卿所知，何如一塵？

梵志聞之，有慚愧色。即便叩頭，願為弟子。

佛即受之，令作沙門，意解妄止，即得應真。

※昔，舍衛國有大長者，名曰須達，得須陀洹道。

有親友長者，名曰好施，不信佛道及諸醫術。時，得重病，痿頓著床。

宗親知友皆就省問，勸令治病，至死不肯。

答眾人言：吾事日月，忠孝君父，畢命於此，終不改志。

須達語曰：吾所事師，號曰為佛，神德廣被，見者得福。可試請來，說經咒願。聽其所說言行進趣，何如餘道。事之與不，隨卿所志。以卿病久，不時除瘥，勸卿請佛，冀蒙得福。

好施曰：佳！卿便為吾請佛及眾弟子。

須達即便請佛及僧往詣其門。

佛放光明，內外通徹。長者見光，欣然身輕。

佛前就坐，慰問長者：所病何如？昔事何神？作何療治？

長者白佛：奉事日月、君長先人。恭敬齋戒，祈請萬端。得病經時，未蒙恩祐。醫藥針灸，居門所忌。經戒福德，素所不知。先人以來，守死於此。

佛告長者：人生世間，橫死有三：①有病不治，為一橫死。②治而不慎，為二橫死。③憍恣自用，不達逆順，為三橫死。

如此病者，非日月天地先人君父所能除遣。當以明道，隨時安濟：①四大寒熱，當須醫藥。②眾邪惡鬼，當須經戒。③奉事賢聖，矜濟窮厄。德感神祇，祐群生，以大智慧，消去陰蓋。奉行如此，現世安吉，終無枉橫。戒慧清淨，世世常安。

於是，世尊即說偈言：

事日為明故	事父為恩故	事君以力故	聞故事道人
人為命事醫	欲勝依豪強	法在智慧處	福行世世明
察友在為謀	別伴在急時	觀妻在房樂	欲知智在說
為能師見道	解疑令學明	亦與清淨本	能奉持法藏

聞能今世利 妻子昆弟友 亦致後世福 積聞成聖智
能攝為解義 解則戒不穿 受法猗法者 從是疾得安
是能散憂患 亦除不祥衰 欲得安隱吉 當事多聞者
於是，長者聞佛說法。心意疑結，霏然雲除。良醫進療，委心道德。四大安靜，眾患消除。如飲甘露，中外怡懌。身安心定，得須陀洹道。宗室國人，莫不敬奉。

※昔，羅閱祇國南有大山，去城二百里。

南土諸國，路由此山，山道深邃。有五百賊，依嶮劫人。後遂縱橫，所害狼藉，眾賈被毒，王路不通。國王追討，不能擒獲。

時，佛在國，哀愍群生。念彼賊輩不知罪福，世有如來而目不睹，法鼓日震而耳不聞。吾不往度，如石沉淵。

便化作一人，著好衣服，乘馬帶刀，手執弓矢，鞍勒嚴飾，金銀莊校。以明月珠，垂絡馬體。跨馬鳴絃，往入山中。

群賊見之，以為成事。作賊積年，未有此便，卯之投石，與此何異？群賊齊

頭住前圍繞，挽弓拔刀，諍欲剝脫。

於是，化人舉弓一發，使五百賊，各被一箭。以刀指擬，各被一瘡。瘡重箭深，即皆顛倒。

五百群賊，宛轉臥地，叩頭歸降：為是何神，威力乃爾？乞蒙原赦，以活微命。願時拔箭，使瘡除愈。今者瘡痛，不可堪忍。

化人答曰：是瘡不痛、箭不為深。天下瘡重，莫過於憂。殘害之甚，莫過於愚。汝懷貪得之憂、殘殺之愚，刀瘡毒箭終不可愈。此二事者，根本深固，勇力壯士所不能拔。唯有經戒多聞慧義，以此明道，療治心病。拔除憂愛愚癡貢高，制伏剛強豪富貪欲，積德學慧，乃可得除，長獲安隱。

於是，化人即現佛身，相好挺特，金顏殊妙。即說偈言：

斫瘡無過憂 射箭無過愚 是壯莫能拔 唯從多聞除

盲者從得眼 闇者從得燭 示導世間人 如日將無目

是故可捨癡 離慢豪富樂 務學事聞者 是名積聚德

於是，五百人見佛光相，重聞此偈。叩頭歸命，剋心悔過。刀瘡毒箭，自然

除愈。歡喜心開，即受五戒。國界安寧，莫不歡喜。

④ 篤信品

※昔者，舍衛國東南有大江，水既深而廣。

有五百餘家，居在岸邊。未聞道德度世之行，習於剛強，欺詐為務，貪利自恣，快心極意。

世尊常念：其應度者，當往度之。知此諸家，福應當度。於是世尊，往至水邊，坐一樹下。

村人見佛光相奇異，莫不驚肅。皆往禮敬，或拜或揖，問訊起居。

佛命令坐，為說經法。眾人聞之，而心不信，習於欺怠，不信真言。

佛便化作一人，從江南來，足行水上，正沒其踝，來至佛前，稽首禮佛。

眾人見之，莫不驚怪。問化人曰：吾等先人以來，居此江邊，未曾聞人行水上者。卿是何人？有何道術，履水不沒？願聞其意。

化人答曰：吾是江南愚直之人，聞佛在此。貪樂道德，至南岸邊不時得渡。

問彼岸人：水為深淺？

彼人見語：「水可齊蹠，何不涉渡？」吾信其言，便爾來過，無他異術。

佛時讚言：善哉！善哉！夫執信誠諦，可度生死之淵。數里之江何足為奇？於是，世尊即說偈言：

信能渡淵 攝為船師 精進除苦 慧到彼岸

士有信行 為聖所譽 樂無為者 一切縛解

信乃得道 法致滅度 從聞得智 所到有明

信之與戒 慧意能行 健夫度患 從是脫淵

於是，村人聞佛所說。見信之證，心開信堅。皆受五戒，為清信士。明信曰修，法教普聞。

※昔，佛在世時，有大長者名修羅陀。財富無數，信向道德。

自誓：常以臘月八日，請佛及僧。終身子孫奉行不廢。

長者亡時，囑兒勿廢。兒名比羅陀，後日漸貧，居無所有。臘月已至，無有供辦，愁感不樂。

佛遣目連往問比羅陀：汝父直月欲至，當設何計？

比羅陀答言：亡父教令，不敢違之。惟願世尊勿見忽棄也。八日中時，迴光臨眄。

目連還白如是。

比羅陀即將妻子至外家，質取百兩金，還舍供辦，一切具足。

佛與千二百五十眾僧，往詣其舍。坐畢行水，下食澡竟，還於精舍。

比羅陀歡喜，不敢悔恨。其日夜半，諸故藏中，自然寶物悉滿如故。

比羅陀夫婦明旦見之，喜而且懼。懼官見問，所從得此？

夫妻共議，當往問佛。尋到佛所，具白如此。

佛告比羅陀：安意快用，勿有疑難。汝之履信，不違父教，持戒慚愧，沒命不二，聞施慧道，七財滿具。福德所致，非為災變。智者能行，不問男女，所生之處，福應自然。

於是，世尊即說偈言：

信財戒財	慚財愧財	聞財施財	慧為七財
從信守戒	常淨觀法	慧而履行	奉教不忘

生有此財 不問男女 終已不貧 賢者識真

比羅陀聞佛所說。益加篤信，稽首佛足，歡喜還家，具宣佛教，誨其妻子，遂相承繼，皆得道跡。

⑤ 戒慎品

※昔，波羅奈國有山，去城四五十里，有五沙門，處山學道。

晨旦出山，人間乞食。食訖還山，晚暮乃到。往還疲極，不堪坐禪，思惟正定。歷年如是，不能得道。

佛愍念之勞而無獲。化作一道人，往到其所。問諸道人：隱居修道，得無勞倦？

諸沙門言：吾等在此，去城既遠。四大之身，當須飲食。日日供給，往還疲勞，經年歷歲，勤苦竟已。晝日往返，暮輒疲頓，不暇復得修道。為當正爾，畢命而已。

道人語曰：夫為道者，以戒為本，攝心為行，賤形貴真，捐棄軀命。食以支形，守意正定，內學止觀，滅意得道。養身順情，安得免苦？願諸道人明日莫

行，吾當供養。使諸道人，休息一日。

時，五沙門意大歡喜，怪未曾有。安心定意，不復憂行。明日日中，此化道人送食而來，食訖安和，心意恬怕。於是化人，為說偈言：

比丘立戒 守攝諸根 食知自節 寤意令應

以戒降心 守意正定 內學止觀 無忘正智

明哲守戒 內思正智 行道如應 自淨除苦

化道人說此偈已，顯現佛身光相之容。

於是，五沙門精神震疊，咸思惟戒，即得阿羅漢道。

⑥ 惟念品

※昔，佛在世時。弗加沙王與瓶沙王親友。

弗加沙王未知佛道，作七寶花以遺瓶沙。瓶沙王得之，轉奉上佛。

白佛言：弗加沙王與我為友，遺我此花，今以上佛。願令彼王，心開意解，見佛聞法，奉敬聖眾。當以何物以報所遺？

佛告瓶沙：寫十二因緣經，送持與之。彼王得經，心必信解。

即寫經卷。別書，文曰：卿以寶花見遺，今以法花相上。詳思其義，果報深美。到便誦習，以同道味。

弗加沙王得經。讀之，尋省反覆，燿然信解。喟然嘆曰：道化真妙，精義安神。國榮五欲，憂惱之原。累劫習迷，始今乃寤。顧視流俗，無可貪樂。

即召群臣，國付太子。便自剃頭，行作沙門，法服持鉢，詣羅閱祇城外，在陶家窯中寄宿。明日當入城分衛，食訖，當至佛所，奉受經戒。

佛以神通，知「弗加沙，明日食時，其命將終。」。故從遠來，不得見佛，又不聞經，甚可憐愍。於是，世尊化作沙門，往至陶家，欲求寄宿。

陶家語曰：向有一沙門在彼窯中，可共止宿也。

把草入窯，坐於一面。問弗加沙：從何所來？師為是誰？以何因緣，行作沙門？為見佛未？

弗加沙言：吾未見佛。聞十二因緣，便作沙門。明日入城，乃分衛已，當往見佛耳。

化沙門言：人命危脆，朝夕有變，無常宿對，卒至無期。但當觀身，四大所

由，合成散滅，各還其本。思惟覺意，空淨無想，專念三尊、布施戒德。能知無常，見佛無異。方念明日，種無益想。

時，化沙門即說偈言：

夫人得善利 乃來自歸佛 是故當晝夜 常念佛法眾

已知自覺意 是為佛弟子 常當晝夜念 佛與法及眾

念身念非常 念戒布施德 空不願無相 晝夜當念是

時，化沙門在於窯中，為弗加沙說非常之要。弗加沙王思惟意定，即得阿那含道。

佛知已解，為現佛身，光明相好。

弗加沙王驚喜踊躍，稽首作禮。

佛重告之曰：罪對無常，畢故莫恐。

弗加沙王言：敬奉尊教。

忽然別去。明日食時，弗加沙王入城分衛。於城門中，逢新產犍牛護犢，舐殺弗加沙王，腹潰命終，即生阿那含天。

佛遣諸弟子耶旬起塔。佛語諸弟子：罪對之根，不可不慎。

⑦ 慈仁品

※昔，佛在羅閱祇，去國五百里有山。山中有一家，有百二十二人。

生長山藪，殺獵為業，衣皮食肉，初不田作，奉事鬼神，不識三尊。

佛以聖智，明其應度。往詣其家，坐一樹下。男子行獵，唯有婦女在。見佛光相，明照天地。山中木石，皆變金色。大小驚喜，知佛神人。皆往禮拜，供施坐席。

佛為諸母人，說：「殺生之罪、行慈之福。恩愛一時，會有離別。」

諸母人聞經歡喜。前白佛言：山民貪害，以肉為食，欲設微供，願當納受。

佛告諸母人：諸佛之法，不以肉食。吾已食來，不須復辦。

因告之曰：夫人生世，所食無數。何以不作有益之食，而殘害群生，以自濟活。死墮惡道，損而無益？人食五穀，當愍眾生。蠕動之類，莫不貪生。殺彼活己，殃罪不朽。慈仁不殺，世世無患。

於是，世尊即說偈言：

為仁不殺 常能攝身 是處不死 所適無患
不殺為仁 慎言守心 是處不死 所適無患
垂拱無為 不害眾生 無所燒惱 是應梵天
常以慈哀 淨如佛教 知足知止 是度生死

佛說偈已。男子獵還。諸婦聽經，不復行迎。其夫驚疑，怪不如常。棄肉來歸，謂有變故。至，見諸婦皆坐佛前，叉手聽經。瞋恚聲張，欲圖毀佛。

諸婦諫曰：此是神人，勿興惡意也。

即各悔過，為佛作禮。

佛重為說不殺之福、殘害之罪。

夫主意解，長跪白佛：吾等生長深山，以殺獵自居，罪過累積。當行何法，得免重殃？

於是，世尊即說偈言：

履仁行慈 博愛濟眾 有十一譽 福常隨身
臥安覺安 不見惡夢 天護仁愛 不毒不兵

水火不喪 所在得利 死昇梵天 是為十一

佛說偈已，男女大小百二十二人歡欣信受，皆奉持五戒。

佛語瓶沙王：給其田地，賜與穀食。仁化廣普，國界安寧。

※昔，有大國王，名和默，處在邊境。

未睹三尊聖妙之化，奉事梵志外道妖蠱。舉國奉邪，殺生祭祀，以此為常。

時，王母病，痿頓著床。使諸醫師，不蒙湯藥。遣諸醫女，所在請求，經年歷歲，未得除瘥。更召國內諸婆羅門，得二百人，請入令坐，供設飲食，而告之曰：吾太夫人病困經久，不知何故乃使如此？卿等多智，明識相法、天地星宿，有何不可，具見告示？

諸婆羅門言：星宿倒錯，陰陽不調，故使爾耳。

王曰：作何方宜，使得除愈？

婆羅門言：當於城外平治淨處，郊祠四山日月星宿，當得百頭畜生，種種各異類，及一小兒，殺以祠天。王自躬身將母至彼，跪拜請命，然後乃瘥。

王即供辦如其所言。驅人象馬牛羊百頭，隨道悲鳴，震動天地，從東門出，

當就祭壇殺以祠天。

世尊大慈普濟眾生，愍是國王頑愚之甚。云何興惡殺眾生命，欲救一人？於是世尊將從大眾往到其國。在城東門道路，逢王及婆羅門輩，所驅畜生悲鳴而來。王遙見佛，如日初出，如月盛滿，光相炳然，照曜天地。人民見者，莫不愛敬。所驅畜生祭餽之具，皆願求脫。王即前進，下車卻蓋，為佛作禮，叉手長跪，問訊世尊。

佛命令坐。問欲所至？

拱手答言：國太夫人得病經久，良醫神祇無不周遍。今始欲行解謝星宿四山五嶽，為母請命，冀蒙得瘥。

佛告大王：善聽一言。欲得穀食，當行耕種。欲得大富，當行布施。欲得長命，當行大慈。欲得智慧，當行學問。行此四事，隨其所種，還得其果。夫富貴之家，不貪貧賤之食。諸天以七寶為宮殿，衣食自然，豈當捨甘露之餐，來食粗穢也？祠祀姪亂，以邪為正，殺生求生，去生道遠。殺害眾命以救一人，安得如此？

於是，世尊即說偈言：

若人壽百歲 勤事天下神 象馬用祭祀 不如行一慈

佛說偈時，即放光明，烈照天地，三塗八難莫不歡喜，各得其所。

國王和默聞說妙法，又睹光明，甚大歡喜，即得道跡。

病母聞法，五情悅豫，所患消除。

二百梵志睹佛光相，重聞其言，慚愧悔過，願為弟子。

佛盡受之，皆作沙門，各得如願。

王及大臣請佛說法，供養一月乃去。以法治正，國遂興隆。

⑧ 言語品

※昔，弗加沙王入羅閱祇城分衛，於城門中為新產犍牛所舐殺。

牛主怖懼，賣牛轉與他人。

其人，牽牛欲飲之，牛從後復舐殺其主。

其主有子瞋恚，取牛殺之，於市賣肉。有田舍人買取牛頭，貫擔持歸，去舍里餘，坐樹下息。以牛頭掛樹枝上，須臾繩斷，牛頭來下，正墮人上，牛角刺

人，即時命終。

一日之中，凡殺三人。

瓶沙王聞之，怪其如此。即與群臣行詣佛所，到作禮畢，卻坐王位，叉手。

白佛言：大可怪！世尊！一頭牯牛，而殺三人。將有變故？願聞其意。

佛告瓶沙王：罪對有原，非適今也。

王曰：願聞其由。

佛言：往昔有賈客三人，到他國治生，寄住孤獨老母舍。應雇舍直。見老母孤獨，欺不欲與。伺老母不在，默聲捨去，竟不與直。

老母來歸，不見賈客。即問比居，云皆已去。

老母瞋恚，尋後追逐。疲頓乃及，責索舍直。

三賈客逆罵詈言：我前已相與，云何復索？同聲共抵，不肯與直。

老母單弱，不能奈何，懊惱咒誓，語三賈客：我今窮厄，何忍欺抵於我。願我後世所生之處，若當相值，要當殺汝，正使得道，終不相置也。殺汝乃休，不爾不止。

佛語瓶沙王：爾時，老母者，今此牯牛是也。三賈客者，弗迦沙等三人，為牛所舐殺者是也。

於是，世尊即說偈言：

惡言罵詈	憍陵蔑人	興起是行	疾怨茲生
遜言順辭	尊敬於人	棄結忍惡	疾怨自滅
夫士之生	斧在口中	所以斬身	由其惡言

佛說是時。瓶沙王官屬，一切莫不恭肅，願崇善行。作禮而去。

⑨ 雙要品

※昔，舍衛國王名波斯匿，來至佛所，下車卻蓋，解劍脫履。拱手直進，五體投地，稽首足下，長跪白佛：願以來日，於四街道施設微食，欲使國人知佛至尊，願令眾生遠鬼妖蠱，悉奉五戒，以消國患。

佛言：善哉！夫為國主，宜有明導，率民以道，求來世福。

王曰：至真！請退嚴辦。

手自為饌，身往奉迎佛與眾僧，俱至四衢。佛至就座，即行澡水。

手自斟酌。佛飯食畢，於四道頭為王說法。觀者無數。

時，有兩商人。一人念曰：佛如帝王，弟子猶忠臣。佛陳明法，弟子誦宣。斯王明矣，知佛可尊，屈意奉之。

一人念曰：斯王愚哉！爾為國王，將復何求？佛者若牛，弟子猶車。彼牛牽車，東西南北。佛亦如是，子有何道，而下意奉之？

二人俱去，行三十里停宿。沽酒共飲，評論矚事。

其善念者，四王護之。

其惡念者，太山鬼神令酒入腹如火燒身，出亭路臥，宛轉轍中。晨，商人車五百乘轢殺之焉。

伴明日求之，見死已。然曰：還國見疑「殺人取物去」。不義輕身，委財逝至。

他國國王崩亡，無有太子。讖書云：中土有微人，當王斯土。

故王有神馬，任王必屈膝。即具嚴駕，神馬印綬，行求國主，觀者數千。

商人亦出，國太史曰：彼有黃雲之蓋，斯王者氣也。

神馬屈膝，舐商人足。群臣豫作香湯澡浴，拜為國王。於是，遂處位聽省國事。

深自思曰：余無微善，何緣獲此？必是佛恩，使之然也。

即與群臣向舍衛國，遙稽首曰：賤人無德，蒙世尊慈恩，得王此國。明日願與應真眾，垂意顧斯，一時三月。

佛告阿難：敕諸比丘，明日彼王請，皆當作變化，令彼國王人民歡喜。

各作神足，往到彼國，皆次就座，如法儼然，下食畢訖澡手，為王說法。王曰：吾本微人，素無快德，何緣獲斯？

佛告王曰：昔彼天王飯佛於四衢道。

王心念言：「佛如國王，弟子猶臣下。」王種斯核，今自獲果。

彼一人云：「佛者若牛，弟子猶車。」彼人自種車轆之核，今在太山地獄為火車所轆，自獲其果。

然，非王勇健所能致矣。為善福隨，為惡禍追。此為自作，非天、龍、鬼神所能與。

於是，世尊即說偈言：

心為法本 心尊心使 中心念惡 即言即行

罪苦自追 車轢於轍

心為法本 心尊心使 中心念善 即言即行

福樂自追 如影隨形

佛說經偈已。王及臣民聽者無數，皆大歡喜，逮得法眼。

※昔，長者須達買太子園田，共造精舍，奉上世尊，各請佛及僧供養一月。

佛為二人，廣陳明法，皆得道跡。

時，太子祇陀歡喜還東宮，歎佛之德，作樂自娛。祇弟琉璃，常在王邊。

時，王素服，與諸近臣及後宮夫人，往詣佛所，稽首禮畢，一心聽經。

琉璃在後，典衛御座。時，諸佞臣阿薩陀等姦謀啟曰：試著大王印綬坐御座

上，知似王不？

於是，琉璃即隨其言，被服昇座。諸佞臣等皆共拜賀：正似大王！千載遭遇黎庶之願，豈使東宮窺竅於此？此之御座，豈可昇而復下也？

即率所從，貫甲拔劍，自就到祇洹精舍，斥徙大王不得還宮。與王官屬，戰祇洹間，殺王近臣五百餘人。

王與夫人播迸，晨夜至舍夷國，中道飢餓，王啖蘆葍，腹脹而薨。

於是，琉璃遂即專制，拔劍入東宮，斫殺兄祇。祇知無常，心不恐懼，顏色不變，含笑熙怡，甘心受刃。命未絕間，聞虛空中自然音樂聲，迎其魂神。

佛於祇洹即說偈言：

造喜後喜 行善兩喜 彼喜惟歡 見福心安

今歡後歡 為善兩歡 厥為自祐 受福悅豫

是時，琉璃王尋興兵眾，伐舍夷國，殺害釋種道跡之人，殘暴無道，五逆兼備。

佛記「琉璃不孝不忠，眾罪深重，卻後七日，當為地獄火所燒殺。」又，太史記，記與佛同。

王大怖懾，即乘船入江。吾今處水，火焉得來？

七日日中，有自然火，從水中出。燒船覆沒，王亦被燒。恐怖毒熱，忽然沉

終。

於是，世尊即說偈言：

造憂後憂 行惡兩憂 彼憂唯懼 見罪心懷

今悔後悔 為惡兩悔 厥為自殃 受罪熱惱

佛說是已。告諸比丘：太子祇者，不貪榮位，守死懷道，上生天上，安樂自然。琉璃王者，狂愚快意，死墮地獄，受苦無數。一切世間，豪貴貧賤，皆歸無常，無長存者。是以高士殞命全行，為精神寶。

佛說是時，莫不信受。

※昔，耆闍崛山後，有婆羅門七十餘家，宿福應度。

佛到其村，現道神化。眾人見佛光相巍巍，莫不敬伏。

佛坐樹下，問諸梵志：居此山中，為幾何世？有何方業，以自供給？

答曰：居此以來三十餘世，田作畜牧，以此為業。

又問：奉修何行，求離生死？

答曰：事日月水火隨時祭祠。若有死者，大小聚會，唱生梵天，以離生死。

佛語諸婆羅門：夫田作畜牧，祭祠日月水火唱叫生天，非是長存離生死法。極福無過二十八天，無有道慧，還墮三塗。唯有出家修清淨志，履行寂義，可得泥洹。

於是，世尊即說偈言：

以真為偽	以偽為真	是為邪計	不得真利
知真為真	見偽為偽	是為正計	必得真利
世皆有死	三界無安	諸天雖樂	福盡亦喪
觀諸世間	無生不終	欲離生死	當行道真

七十婆羅門聞佛所說，欣然意解，願作沙門。

佛言：善來比丘！

鬚髮自墮，皆成沙門。佛與比丘共還精舍。

至於中路，顧戀妻息，各有退意。時遇天雨，益懷憂慘。佛知其意，便於道邊化作數十間舍，入中避雨，而舍穿漏。

佛因舍漏，而說偈言：

蓋屋不密 天雨則漏 意不惟行 姪洸為穿

蓋屋善密 雨則不漏 攝意惟行 姪匿不生

七十沙門聞說此偈，雖強自進，猶懷瞢瞢，雨止前行。

地有故紙，佛告比丘取之。受教即取。

佛問比丘：此為何紙？

諸比丘白佛：此裏香之紙。今雖捐棄，處香如故。

佛復前行，地有斷索。佛告比丘取之。受教即取。

佛復問曰：此何等索？

諸比丘白佛：其索腥臭，此繫魚之索。

佛語諸比丘：夫物本淨，皆由因緣以興罪福。近賢明，則道義隆。友愚闇，則殃罪臻。譬彼紙索，近香則香，繫魚則腥。漸染翫習，各不自覺。

於是，世尊即說偈言：

鄙夫染人 如近臭物 漸迷習非 不覺成惡

賢夫染人 如附香熏 進智習善 行成芳潔

七十沙門重聞此偈，知家欲為穢藪，妻子為桎梏，執信堅固。往至精舍，攝意惟行，得阿羅漢道。

⑩ 放逸品

※昔佛在世。時，有五百賈客從海中出。大持七寶還歸本國，經歷深山，為惡鬼所迷，不能得出。糧食乏盡，窮頓困厄，遂皆餓死，所齎寶貨散在山間。時，有沙門在山中學道，見其如此。便起想念：吾勤苦學道，積已七年，不能得道，又復貧窮，無以自濟。此寶物無主，取之持歸，用立門戶。於是，下山拾取寶物，藏著一處。訖。便出山，求呼兄弟，負馱持歸，方到道半。

佛念此比丘，應當得度。佛便化作一比丘尼，剃頭法服，粧面畫眉、金銀瓔珞，隨谷入山。道逢沙門，頭面作禮，問訊起居。

道人呵比丘尼曰：為道之法，應得爾不？剃頭著法衣，云何復粧面畫眉瓔珞身體也？

比丘尼答曰：沙門之法，為應爾不？辭親學道，山居靜志，云何復取非其財

物，貪欲忘道，快心放意？不計無常，生世如寄，罪報延長。

於是，比丘尼為說偈言：

比丘謹慎戒 放逸多憂患 變淨小致大 積惡入火焚
守戒福致喜 犯戒有懼心 能斷三界漏 此乃近涅槃
是時，比丘尼說此偈已。為現佛身，相好光明。

沙門見之，悚然毛豎，稽首佛足，悔過自陳：愚癡迷謬，違犯正教，往而不返，其將奈何？

於是，世尊即說偈言：

若前放逸	後能自禁	是照世間	念定其宜
過失為惡	追覆以善	是照世間	念善其宜
少壯捨家	盛修佛教	是照世間	如月雲消
人前為惡	後止不犯	是照世間	如月雲消

於是，比丘重聞此偈，結解貪止，稽首佛足，還到樹下。數息相隨，止觀還淨。獲道果證，成阿羅漢。

⑪ 心意品

※昔，佛在世。時，有一道人，在河邊樹下學道。十二年中，貪想不除。走心散意，但念六欲，目色、耳聲、鼻香、口味、身更、心法。身靜意遊，曾無寧息。十二年中，不能得道。

佛知可度，化作沙門，往至其所，樹下共宿。

須臾月明，有龜從河中出，來至樹下。復有一水狗，飢行求食，與龜相逢，便欲啖龜。

龜縮其頭尾及其四腳，藏於甲中，不能得啖。水狗小遠。復出其頭足，行步如故。不能奈何，遂便得脫。

於是，道人問化沙門：此龜有護命之鎧，水狗不能得其便。

化沙門答曰：吾念世人，不如此龜。不知無常，放恣六情。外魔得便，形壞神去，生死無端，輪轉五道。苦惱百千，皆意所造。宜自勉勵，求滅度安。

於是，化沙門即說偈言：

有身不久 皆當歸土 形壞神去 寄住何貪

心豫造處 往來無端 念多邪僻 自為招患
是意自造 非父母為 可勉向正 為福勿迴
藏六如龜 防意如城 慧與魔戰 勝則無患
於是，比丘聞說此偈，貪斷望止，即得阿羅漢道。知化沙門是佛世尊，敬肅整服，稽首佛足。天龍鬼神，莫不歡喜。

⑫ 花香品

※昔，佛在舍衛國。國東南，海中有臺，臺上有花香樹，樹木清淨。有婆羅門女五百人，奉事異道，意甚精進，不知有佛。
於時，諸女自相謂曰：我等稟形，生為女人。從少至老，為三事所監。不得自由，命又短促，形如幻化，當復死亡。不如共至花香臺上，採取香花，精進持齋，降屈梵天，當從求願。願生梵天，長壽不死。又得自在，無有監忌。離諸罪對，無復憂患。

即齎供具往至臺上，採取花香奉事梵天，一心持齋，願屈尊神。
於是，世尊見此諸女雖為俗齋，其心精進，應可化度。即與大眾弟子菩薩天

龍鬼神，飛昇虛空，往至臺上，坐於樹下。

諸女歡喜，謂是梵天。自相慶慰，得我所願矣。

時，一天人語諸女言：此非梵天，是三界尊，號名為佛，度人無量。

於是，諸女前至佛所，為佛作禮。前白佛言：我等多垢，今為女人，求離監
檢，願生梵天。

佛言：諸女！快得善利，乃發此願。世有二事，其報明審：為善受福、為惡
受殃。世間之苦、天上之樂，有為之煩、無為之寂，誰能選擇取其真者？善哉
諸女乃有明志。

於是，世尊即說偈言：

孰能擇地 捨監取天 誰說法句 如擇善花

學者擇地 捨監取天 善說法句 能採德花

知世坏喻 幻法忽有 斷魔花敷 不現死生

見身如沫 幻法自然 斷魔花敷 不現死生

於是，諸女聞佛此偈，願學真道，為比丘尼。頭髮自墮，法衣具足，思惟寂

定，即得阿羅漢道。

阿難白佛言：今此諸女，素有何德，乃令世尊就而度之。一聞說法，出家得道也？

佛告阿難：昔，迦葉佛時。有大長者，財富無數，夫人嫫女有五百人。其性妒惡，門不妄開。夫人嫫女欲往見佛，終不肯聽。後日，國王請諸大臣，上殿宴會，會輒竟日。

時，夫人嫫女見長者入會，便共至佛所，稽首作禮，小坐聽經。各發願言：「令我世世，莫與惡人共相遭遇。所生之處，恆與道德聖人相值。聞來世有佛名釋迦文，願與相值，出家學道，奉持訓誨。」

佛語阿難：爾時，夫人嫫女五百人者，今此五百比丘尼是。本願懇惻，今應得度。是以世尊就度之耳。

佛說是時，莫不歡喜。

※昔，佛始得道。在羅閱祇國教化，轉到舍衛國。國王群臣，莫不宗仰。時，有賈客大人名曰波利，與五百賈人入海求寶。

時，海神出，掬水。問波利言：海水為多？掬水為多？

波利答曰：掬水為多。

所以者何？海水雖多，無益時用，不能救彼飢渴之人。掬水雖少，值彼渴者，持用與之，以濟其命，世世受福，不可稱計。

海神歡喜，讚言善哉！即脫身上八種香瓔校以七寶，以上波利。

海神送之，安善往還。到舍衛國，持此香瓔上波斯匿王，具陳所由：念是香瓔，非小人所服，謹以貢上，願蒙納受。

王得香瓔以為奇異，即呼諸夫人羅列前往：若最好者，以香瓔與之。

六萬夫人盡嚴來出。王問：末利夫人何以不出？

侍人答言：今十五日，持佛法齋，素服不嚴，是以不出。

王便瞋恚，遣人呼曰：汝今持齋，應違王主之命不乎？

如是三反。末利夫人素服而出，在眾人中，猶如日月，倍好於常。王意悚然加敬。問曰：有何道德，炳然有異？

夫人白王：自念少福，稟斯女形。情態穢垢，日夜山積，人命短促，懼墜三

塗。是以月月奉佛法齋，割愛從道，世世蒙福。

王聞歡喜，便以香瓔以與末利夫人。

夫人答言：我今持齋，不應著此，可與餘人。

王曰：我本發意欲與勝者，卿今最勝，又奉法齋，道志殊高，是以相與。若卿不受，吾將安置？

夫人答言：大王勿憂！願王屈意共到佛所，以此香瓔奉上世尊，并採聖訓，累劫之福矣。

王即許焉，即敕嚴駕，往到佛所，稽首於地，卻就王位。

王白佛言：海神香瓔，波利所上。六萬夫人莫不貪得，末利夫人與而不取，持佛法齋，心無貪欲，謹以上佛，願垂納受。世尊弟子執心護齋，直信如此，豈有福乎？

於是，世尊為受香瓔，即說偈言：

多作寶花	結步搖綺	廣積德香	所生轉好
琦草芳花	不逆風熏	近道敷聞	德人遍香

栴檀多香 青蓮芳花 雖曰是真 不如戒香

花香氣微 不可謂真 持戒之香 到天殊勝

戒具成就 行無放逸 定意度脫 長離魔道

佛說偈已。重告王曰：齋之福祐，明譽廣遠。譬如天下十六大國滿中珍寶，持用布施。不如末利夫人一日一夕持佛法齋。如比其福，須彌以豆矣。積福學慧，可到泥洹。

王及夫人、群臣大小，莫不歡喜，執戴奉行。

※昔，佛在羅閱祇耆闍崛山中。

於時，城中有長者子五十人，往詣佛所，作禮卻坐。

時，佛為說無常苦空非身之法。恩愛如夢，會當別離，尊榮豪貴亦有憂惑。

唯有泥洹，永離生死，群殃盡滅，乃可大安。

時，五十人聞法喜悅，願為弟子。

佛言：善來比丘！

鬚髮自墮，法衣具足，即成沙門。此諸沙門有親友長者，聞其出家，意大歡

喜，往到崛山與之相見。讚言：諸君快哉善利，乃有此志。

為之設壇請佛及僧。明日佛與眾會就其舍食。食訖說法，晡時乃還。

此諸新學沙門戀慕宗黨，皆欲返退。

佛知其意，將出城門，見田溝中污泥糞壤中生蓮花，五色香潔，其香芬熏，乃蔽諸臭。佛便趣之，因說偈言：

如作田溝 近於大道 中生蓮花 香潔可意

有生死然 凡夫處邊 智者樂出 為佛弟子

佛說偈已，即還山中。

賢者阿難前白佛言：向者世尊臨田溝上，所說二偈，不審其義，願聞其意。

佛告阿難：汝見溝中，污泥不淨，糞壤之中，生蓮花不？

唯然，見之。

佛言：阿難！人在世間展轉相生。計壽百歲，或長或短。妻子恩愛，飢渴寒熱，或悲或欣。一凶、二吉、三毒、四倒、五陰、六入、七識、八邪、九惱、十惡。猶如田溝，畜藏糞壤，污泥不淨。欸有一人覺世無常，發心學道，修清

淨志，凝神斷想，自致得道。亦如污泥生好蓮花，身自得道，還度宗親。一切眾生皆蒙開解，亦如花香掩蔽臭穢。

五十比丘聞佛說法，進志堅固，即得阿羅漢道。

⑬ 愚闇品

※昔，佛在舍衛國。

時，城中有婆羅門，年向八十，財富無數。為人頑闇慳貪難化，不識道德，不計無常。更作好舍，前庑後堂，涼臺煖室，東西廂廡，數十梁間。唯後堂前拒陽未訖。

時，婆羅門恆自經營，指授眾事。

佛以道眼，見此老翁，命不終日，當就後世，不能自知，而方匆匆，形瘦力竭，精神無福，甚可憐愍。

佛將阿難往到其門，慰問老翁：得無勞倦？今作此舍，皆何所安？

老翁答言：前庑待客、後堂自處。東西二廂，當安兒息、財物、僕使。夏上涼臺、冬入溫室。

佛語老翁：久聞宿德思遲談講，偶有要偈，存亡有益，欲以相贈。不審可小廢事，共坐論不也？

老翁答言：今正大懔，不容坐語。後日更來，當共善敘，所云要偈，便可說之。

於是，世尊即說偈言：

有子有財 愚惟汲汲 我且非我 何憂子財

暑當止此 寒當止此 愚多豫慮 莫知來變

愚矇愚極 自謂我智 愚如稱智 是謂極愚

婆羅門言：善說此偈，今實太懔，後來更論之。

於是，世尊傷之而去。

老翁於後，自授屋椽，椽墮打頭，即時命過。室家啼哭，驚動四鄰。

佛去未遠，便有此變。

佛到里頭，逢諸梵志，有數十人。前問佛言：從何所來？

佛言：屬到此老翁舍為翁說法。不信佛語，不知無常，今者忽然已就後世。

具為諸梵志更說前偈義。聞之欣然，即得道跡。

於是世尊，而說偈言：

愚闇近智	如瓢斟味	雖久狎習	猶不知法
開達近智	如舌嘗味	雖須臾習	即解道要
愚人施行	為身招患	快心作惡	自致重殃
行為不善	退見悔吝	致涕流面	報由宿習

時，諸梵志重聞此偈，益懷篤信，為佛作禮，歡喜奉行。

※昔，佛在舍衛國給孤獨精舍，為諸天人說法。

時，波斯匿王，有一寡女，名曰金剛，少寡來歸。父母哀愍，別為立宮，作好舍宅，給五百妓女以娛樂之。

眾中，有一長老青衣，名曰度勝，恆行市買脂粉香花。時，見男女無數大眾各齎香花出城。即問行人：欲何所至？

眾人答言：佛出於世，三界之尊，度脫眾生，皆得泥洹。

度勝聞之，心悅意喜。即自念言：今老見佛，宿世之福。便分香直，持買好

花，隨眾人輩往到佛所，作禮卻立，散花燒香。一心聽法已，過市取香。因聽法功德，宿行所追，香氣熏聞，斤兩倍前。

嫌其遲晚而共詰之。度勝奉道，即如事言：世有聖師，三界之尊，擊無上法鼓，震動三千。往聽法者，無央數人。實隨聽法，是以稽遲。

金剛之徒聞說世尊法義殊妙，非世所聞，悚然心歡。而自歎曰：吾等何罪，獨隔不聞？即報度勝：試為我說之。

度勝白曰：身賤口穢，不敢便宜。乞更諮受，如命說之。即便遣出。

重告之曰：具受儀式。

度勝未還。金剛侍女側息中庭，如子待母。

佛告度勝：汝還說法，多所度脫。說法之儀，先施高座。

度勝受敕，具宣聖旨。皆大歡喜，各脫衣一領，積為高座。

度勝洗浴，承佛威神，如應說法。金剛之等五百餘人，疑解破惡，得須陀洹道。說法甚美，不覺失火，一時燒死，即生天上。

王將人從，來欲救火，見之已燃，收拾棺殮。葬送畢訖，往過佛所，為佛作禮，卻坐常位。

佛問王曰：所從來也？

王叉手言：女金剛不幸，不覺失火，大小燒盡，適棺殮還。不審何罪，遇此火害？惟願，世尊！彰告未聞。

佛告大王：過去世時，有城名波羅奈，有長者婦，將姪女五百人，至城外大祠祀。其法難犯，他姓之人不得到邊。不問親疏，其有來者擲著火中。時，世有一辟支佛，名曰迦羅，處在山中，晨來分衛，暮輒還山。迦羅分衛，來趣郊祠。長者婦見之，忿然瞋恚，共捉迦羅撲著火中。舉身焦爛，便現神足，飛昇虛空。眾女驚怖，泣淚悔過，長跪舉頭，而自陳曰：「女人憊愚，不識至真，群愚荒駭，毀辱神靈，自惟過豐，罪惡若山，願降尊德，以消重殃。」尋聲即下，而般泥洹。諸女起塔，供養舍利。

佛為大王，而說偈言：

愚憊作惡 不能自解 殃迫自焚 罪成熾然

愚所望處 不謂適苦 臨墮厄地 乃知不善

佛告大王：爾時長者婦，今王女金剛是；五百侍女，今度勝等五百伎女是。罪福迫人，久無不彰。善惡隨人，如影隨形。

說是法時。諸來大小，信伏歡喜。咸歸三尊，皆受五戒，即得道跡。

⑭ 明哲品

※昔，有梵志，其年二十，天才自然，事無大小，過目則能。

自以聰哲，而自誓曰：天下技術，要當盡知。一藝不通，則非明達也。

於是遊學，無師不造。六藝雜術，天文地理，醫方鎮厭，山崩地動，擣菹博弈，妓樂博撮，裁割衣裳，文繡綾綺，廚膳切割，調和滋味，人間之事，無不兼達。

心自念曰：丈夫如此，誰能及者？試遊諸國，摧伏觝對，奮名四海，技術衝天。然後載功竹帛，垂勳百代。

於是，遊行往至一國，入市觀視。見有一人，坐作角弓，析筋治角，用手如飛，作弓調快，買者諍前。

即自念曰：少來所學，自以具足，邂逅自輕，不學作弓。若彼鬥技，吾則不如矣，當從受學耳。

遂從弓師，求為弟子，盡心受學。月日之中，具解弓法，所作巧妙，乃踰於師。布施財物，奉辭而去。

去之一國，當渡江水。有一船師，用船若飛，迴旋上下，便疾無雙。

復自念曰：吾技雖多，未曾習船，雖為賤術，其於不知，宜當學之，萬技悉備。

遂從船師，願為弟子，供奉盡敬，竭力勞動。月日之中，知其逆順，御船迴旋，乃踰於師。布施財物，奉辭而去。

復至一國，國王宮殿，天下無雙。

即自念曰：作此殿匠，巧妙乃爾。自隱遊來，偶不學之。若與競術，必不勝矣，且當復學，意乃足耳。

遂求殿匠，願為弟子，盡心供養，執持斤斧。月日之間，具解尺寸、方圓規矩，雕文刻鏤，木事盡知，天才明朗，事輒勝師。布施所有，辭師而去。

周行天下，遍十六大國，命敵挽技，獨言隻步，無敢應者。心自貢高，曰：天地之間，誰有勝我者？

佛在祇洹，遙見此人應可化度。佛以神足化作沙門，拄杖持鉢，在前而來。梵志由來，國無道法，未見沙門，怪是何人？頃至當問。

須臾來到。梵志問曰：百王之則，未見君輩。衣裳制度，無有此服。宗廟異物，不見此器。君是何人，形服改常也？

沙門答曰：吾調身人也。

復問：何謂調身？

於是，沙門因其所習，而說偈言：

弓匠調角 水人調船 巧匠調木 智者調身

譬如厚石 風不能移 智者意重 毀譽不傾

譬如深淵 澄靜清明 慧人聞道 心淨歡然

於是，沙門說此偈已。身昇虛空，還現佛身，三十二相、八十種好。光明洞達，照曜天地。從空來下，謂其人曰：吾道德變化，調身之力也。

於是，其人五體投地。稽首問曰：願聞調身，其有要乎？

佛告梵志：五戒十善、四等六度、四禪三解脫，此調身之法也。夫弓船木匠六藝奇術，斯皆綺飾華譽之事，蕩身縱意，生死之路也。

梵志聞之，欣然信解，願為弟子。

佛言：沙門善來！

鬚髮自墮，即成沙門。佛重為說四諦八解之要，尋時即得阿羅漢道。

※昔，佛在舍衛國。

有山民村五六十家，去國五百里。村中有一貧家，其主人婦懷妊十月，雙生二男，甚大端政無比，父母愛之，便為作字，一名雙德，二名雙福。生五十六日，其父放牛來還，懈怠卻臥床上，其母出田拾薪未還。

此二小兒，左右顧視，不見父母，便共相責語。

一人言：前世之時，垂當得道，正坐愚意謂命可常，退墮生死，不可計劫，今乃得生此貧家作子。穰草之中，以氈褐自覆；食飲粗惡，纔自支身。如此至久，云何可活？皆坐前世戀慕富貴，放身散意，快樂須臾，從爾以來，長塗受

苦。如今憂惱，當何恃怙？

一人答曰：我爾時小，難一時之勤，竟不精進，而令數世遭諸苦患，此是自為，非父母作也。但共當之，復何所言？

父聞二子相責如是，甚大怪之。謂呼是鬼崇來生災變，云何數十日小兒乃作此言？恐其後日殺親滅族，曼小未大，宜當殺之。其父驚出，閉門捨去，到田取薪，欲燒殺之。

其母來還。問夫：用此薪為？

夫言：甚大可怪，所說如是，此似是鬼，必破人門族，以其曼小欲燒殺之。其母聞此，意中愕然，猶豫未信：小停數日，更聽其言。

至明日，夫婦俱出於戶外，潛聽二兒在內相責如故。夫婦重共聞之，甚怪所以，便共集薪，密欲燒之。

佛以天眼見此夫婦欲燒殺二子，愍其可憐，宿福應度。往到其村普放光明，天地大動，山川樹木皆作金色。村中大小驚到佛所，為佛作禮，莫不歡喜。知佛至神，三界無比。佛到雙生小兒家，二兒見佛光明，喜踊難量。父母又驚，

各抱一子，將至佛所，問佛世尊：此兒生來五六十日所說如是，甚共怪之，恐作禍害，欲火燒殺之。正值佛來，未及得燒。不知此兒為何等鬼魅也？惟願解說是何災怪？

小兒見佛，踊躍歡喜。佛見小兒，大笑。口出五色光，普照天地。

佛告小兒父母及村人大小：此二小兒，非是鬼魅，福德之子。前迦葉佛時，曾作沙門，少小共為朋友，同志出家，各自精進，臨當得道，歛起邪想，共相沮敗，樂世榮華，恃福生天，下為侯王國主長者，歛起是想，便墮退轉，不得涅槃。更此生死，彌連劫數，常相鉤牽，輒共雙生。遭我世時，今始乃生。已往供養佛功德故，餘福應度，罪滅福生，自識宿命。是以世尊故來度之，我不度者，橫為火所燒。

於是，世尊即說偈言：

大人體無欲	在所照然明	雖或遭苦樂	不高現其智
大賢無世事	不願子財國	常守戒慧道	不貪邪富貴
智人知動搖	譬如沙中樹	朋友志未強	隨色染其素

佛說是時。小兒見佛，其身即踊如八歲小兒，即作沙彌，得阿羅漢道。村人大小，見佛光相，又見小兒形變踊大，皆大歡喜，得須陀洹道。父母疑解，亦得法眼。

⑮ 羅漢品

※昔，有一國，名曰那梨，近南海邊。其中人民採真珠梅檀以為常業。其國有一家，兄弟二人，父母終亡，欲求分異。

家有一奴，名曰分那，年少聰了，賈販市買，入海治生，無事不知。居家財物分為一分，以奴分那持作一分。兄弟擲籌，弟得分那，止將妻子空手出舍。

時世饑饉，唯得分那，恐不相活，以為愁憂。

時，奴分那白大家言：願莫愁憂。分那作計，月日之中，當令勝兄。

大家言：若審能爾者，放汝為良人。

大家夫人有私珠物與分那作本。時海潮來，城內人民至水邊取薪。

分那持珠物出至城外，見一乞兒負薪，薪中有牛頭梅檀香，可治重病，一兩

直千兩金，時世有一，不可常得。

分那識之，以金錢二枚買得持歸，破作數十段。

時，有長者得重病，當須此牛頭栴檀香二兩合藥，求不能得。

分那持往，即得二千兩金。如是賣盡，所得不訾，富兄十倍。

大家感念分那之恩，不違言誓，放為良人，隨意所樂。

於是，分那辭行學道，到舍衛國，為佛作禮，長跪白佛：所出微賤，心樂道德。惟願，世尊！垂慈濟度。

佛言：善來分那！

頭髮自墮，法衣著身，即成沙門。佛為說法，尋得阿羅漢道。坐自思惟：今得六通，存亡自由，皆主人之恩。今當往度，并化國人。

於時，分那往到本國，至主人家。主人歡喜，請坐設食，食訖澡手，飛昇虛空，分身散體，半出水火，光明洞達，從上來下。告主人曰：此之神德，皆是主人放捨之福。往到佛所，所學如是。

主人答曰：佛之神化，微妙乃爾。願見世尊，受其教訓。

分那答曰：但當志心供設饌具，佛三達智，必自來矣。
即便設供，宿昔已辦，向舍衛國，稽首長跪，燒香請佛：惟願屈尊，廣度一切。

佛知其意，即與五百阿羅漢，各以神足往到其舍。國王人民莫不敬肅，來至佛所，五體投地，卻坐王位。食畢澡訖，佛為主人，及王官屬，廣陳明法，皆受五戒，為佛弟子。起住佛前，歎分那曰：在家精勤，出家得道，神德高遠，家國蒙度，我當云何以報其恩？

於是，世尊重歎分那而說偈言：

心已休息 言行亦止 從正解脫 寂然歸滅

棄欲無著 缺三界障 望意已絕 是謂上人

若聚若野 平地高岸 應真所過 莫不蒙度

彼樂空閑 眾人不能 快哉無望 無所欲求

佛說偈已，主人及王益加歡喜，供養七日，得須陀洹道。

※昔，佛在舍衛國。

有一長老比丘，字般特，新作比丘，稟性闇塞。

佛令五百阿羅漢日日教之。三年之中，不得一偈。國中四輩皆知其愚冥。

佛愍傷之，即呼著前，授與一偈：

守口攝意身莫犯 如是行者得度世

時，般特感佛慈恩，歡欣心開，誦偈上口。

佛告之曰：汝今年老方得一偈，人皆知之，不足為奇。今當為汝解說其義，一心諦聽。

般特受教而聽。佛即為說身三口四意三所由。觀其所起，察其所滅。三界五道，輪轉不息。由之昇天、由之墮淵，由之得道，涅槃自然。分別為說無量妙法。

時，般特霽然心開，即得阿羅漢道。

爾時，有五百比丘尼別有精舍。佛日遣一比丘為說經法。

明日，般特次應當行。

諸尼聞之，皆豫含笑：明日來者，我等當共逆說其偈，令之慚愧無所一言。明日般特往，諸比丘尼大小皆出作禮。相視而笑，坐畢下食，食已澡手，請令說法。

時般特即上高座，自慚否曰：薄德下才，末為沙門，頑鈍有素，所學不多，唯知一偈，粗識其義，當為敷演，願各靜聽。

諸年少比丘尼欲逆說偈，口不能開，驚怖自責，稽首悔過。

般特即如佛所說，一一分別身意所由，罪福內外，昇天得道，凝神斷想，入定之法。

即時，諸尼聞其所說，甚怪其異。一心歡喜，皆得阿羅漢道。

後日，國王波斯匿請佛眾僧於正殿會。

佛欲現般特威神，與鉢令持，隨後而行。門士識之，留不聽入：卿為沙門，一偈不了，受請何為？吾是俗人，尚由知偈，豈況沙門無有智慧，施卿無益，不須入門。

時，般特即住門外。佛坐正殿上，行水已畢，般特即擎鉢申臂遙以授佛。

王及群臣、夫人、太子、眾會四輩，見臂來入，不見其形，怪而問佛：是何人臂？

佛言：是般特比丘臂也，近日得道向。吾使持鉢，門士不聽來入，是以申臂授吾鉢耳。

即便請入，威神倍常。王白佛言：聞般特本性愚鈍，方知一偈，何緣得道？佛告王曰：學不必多，行之為上。般特解一偈義，精理入神，身口意寂，淨如天金。人雖多學，不解不行，徒喪識想，有何益哉？

於是，世尊即說偈言：

雖誦千章 句義不正 不如一要 聞可滅惡

雖誦千言 不義何益 不如一義 聞行可度

雖多誦經 不解何益 解一法句 行可得道

佛說偈已。三百比丘得阿羅漢道。王及群臣、夫人、太子，莫不歡喜。

※昔，佛在舍衛國精舍之中，為天人說法。

時，舍衛國中，有婆羅門長者，名藍達，大富無極，其家資財不可計數。

梵志之法，當作大檀以顯名譽。盡家之財，持用布施。作般闍于瑟，供養婆羅門五千餘人，五年之中供給衣被床榻醫藥珍琦寶物郊祠供具，盡所愛惜。

諸梵志等五年之中，為羅摩達長者祭祀諸天四山五嶽星宿水火，無不周遍，咒願長者長夜受福。五歲已周，最後一日極大布施，如長者法，金鉢盛銀粟，銀鉢盛金粟，象馬車乘奴婢資財，七寶服飾繖蓋履屣，鹿皮之衣，錫杖踞床，澡罐澡盤，床榻席薦，所應當得，事事八萬四千，盡持布施。當其爾日，皆來大會，鬼神國王大臣梵志大姓，悉來會坐，隱隱闐闐，莫不歡欣。

佛見如是，歎然言曰：此大姓梵志何以愚癡？所施太多，福報薄少。如種火中，何從得報也？若我不化，長離法門。

於是，世尊便起嚴服，化從地出，放大光明，普照眾會。大小見之，怪未曾有，驚怖悚懼，不知何神。長者羅摩達及諸大眾，頭面著地，為佛作禮。佛見眾人皆有敬心，因其恭肅，便說偈言：

月千反祠 終身不徹 不如須臾 一心念法

一念造福 勝彼終身

雖終百歲 奉事火神 不如須臾 供養三尊

一供養福 勝彼百年

於是，世尊告藍達曰：施有四事。何等為四？①施多，得福報少。②施少，得福報多。③施多，得福報多。④施少，得報亦少。

何謂施多得福報少者？其人愚癡殺生祭祠，飲酒歌舞破損財寶，無有福慧。何謂施少得報少者？以慳貪惡意，施凡道士，俱兩愚癡，是以無福。

何謂施少得福多者？能以慈心奉道德人，道士食已，精進學誦。施此雖少，其福彌大。

何謂施多得福多者？若有賢者覺世無常，好心出財，起立塔寺精舍果園，供養三尊衣服履屣床榻廚膳。斯福，如五河流入於大海。福流如是，世世不斷。是為施多，其報轉多。譬如農家，地有厚薄，所得不同。

爾時，藍達長者座中會人，見佛變化，聞說法言，皆大歡喜。諸天人神皆得須陀洹道。五千梵志皆作沙門得應真道。主人藍達居家大小，皆受五戒，亦得道跡。國王大臣皆受三自歸，為優婆塞，亦得法眼。

※昔，佛在舍衛精舍教化。

時，羅閱祇國有一人，為人凶愚。不孝父母，輕侮良善，不敬長老。居門衰耗，常不如意。便行事火，欲求福祐。

事火之法，日適欲沒，燃大火聚，向之跪拜，或至夜半，火滅乃止。如是三年，不得其福，更事日月。

事日月法，晝以日出，夜以月明，向日月拜，沒乃休止。如是三年，復不得福。

轉復事天，燒香跪拜，奉上甘美香花酒脯豬羊牛犢。

遂至貧困，故不得福。勤苦憔悴，病不去門。

聞：「舍衛國有佛，諸天所宗。」當往奉事，必望得福。

即到佛所，至精舍門，瞻睹世尊，光相晃然，容顏奇異如星中月。

見佛歡喜，頭面作禮，叉手白佛：生長愚癡，不識三尊。事火日月，及諸天神，九年精勤，永不蒙福，顏色憔悴，氣力衰微，四大多患，死亡無日。伏承世尊度人之師，故遠自歸，願垂福慶。

佛告之曰：汝之所事，盡是妖邪、魑魅魍魎，禱祀如山，罪如江海，殺生求福，去福遠矣。正使百劫勤苦，盡殺普天豬羊，持用禱祀，罪如須彌，福無芥子，徒自費喪，豈不惑哉？

又，卿為人，不孝父母、輕易賢善、不敬長老，憍慢貢高，三毒熾盛，罪豐日深，何緣得福？

若能改心禮敬賢者，威儀禮節供奉長老，棄惡信善，修己崇仁。四福日增，
世世無患。

何等為四？①顏色端正，②氣力豐強，③安隱無病，④益壽，終不枉橫。
行之不懈，亦可得道。

於是，世尊即說偈言：

祭神以求福 從後觀其報 四分未望一 不如禮賢者
能善行禮節 常敬長老者 四福自然增 色力壽而安

於是，其人聞佛此偈，歡喜信解，稽首作禮。

重白佛言：罪垢所蔽，積罪九年，幸賴慈化，今得開解。惟願，世尊！聽為

沙門。

佛言：善來比丘！

頭髮自墮，即成沙門。內思安般，即得阿羅漢道。

⑪ 惡行品

※昔，佛在羅閱祇國。遣一阿羅漢，名曰須漫。持佛髮爪，至罽賓南山中，作佛圖寺。五百阿羅漢常止其中，旦夕燒香，繞塔禮拜。

時，彼山中有五百獼猴，見諸道人供養塔寺，即便相將，至深澗邊，負輦泥石，效作佛圖，豎木立刹，幣幡繫頭，旦夕禮拜，亦如道人。

時，山水瀑漲，五百獼猴一時漂沒，魂神即生第二忉利天上，七寶殿舍，衣食自然。各自念言：從何所來，得生天上？

即以天眼，自見本形獼猴之身，效諸道人戲作塔寺，雖身漂沒，神得生天，今當下報故屍之恩。

各將侍從，花香伎樂，臨故屍上，散花燒香，繞之七匝。

時，山中有五百婆羅門，外學邪見，不信罪福，見諸天人散花作樂，繞獼猴

屍，怪而問曰：諸天光影巍巍乃爾，何故屈意供養此屍？

諸天人言：此屍是吾等故身。昔在此間，效諸道人，戲立塔寺。山水瀑漲，漂殺吾等。以此微福，得生天上。今故散花，以報故身之恩。戲為塔寺，獲福如此，若當至心奉佛世尊，其德難喻。卿等邪見，不信正真，百劫勤苦，無所一得，不如共往至耆闍崛山，禮事供養，得福無限。

即皆欣然，共至佛所，五體作禮，散花供養。

諸天人白佛：我等近世，獼猴之身，蒙世尊之恩，得生天上，恨不見佛，今故自歸。

重白佛言：我等前世，有何罪行，受此獼猴身？雖作塔寺，身被漂殺。

佛告天人：此有因緣，不從空生，吾當為汝說其所由。

乃往昔時，有五百年少婆羅門，共行入山欲求仙道。

時，山上有一沙門，欲於山上泥治精舍，下谷取水，身輕若飛。

五百婆羅門興嫉妒意，同聲笑之：「今此沙門上下翻疾，亦如獼猴耳，何足為奇也！」

如是，取水不止，山水一來，溺殺不久。

佛告諸天人：爾時，上下沙門，我身是也。五百年少婆羅門者，五百獼猴身是。戲笑作罪，身受其報。

於是，世尊即說偈言：

戲笑為惡 已作身行 號泣受報 隨行罪至

佛告諸天人：汝之近世，雖為獸身，乃能戲笑起作塔寺，今得生天，罪滅福興。今者，復來躬奉正教，從此因緣，長離眾苦。

佛說是已，五百天人即得道跡。

其所共來水邊五百婆羅門聞罪福之報，而自歎曰：吾等學仙，積有年數，未蒙果報，不如獼猴戲笑為福，得生天上。佛之道德，實妙乃爾。於是，稽首佛足，願為弟子。

佛言：善來比丘！

即成沙門，精進日修，遂得阿羅漢道。

※昔，佛在舍衛國精舍之中，為諸天人說法。

時，國王第二兒，名曰琉璃，其年二十。將從官屬，退其父王。伐兄太子，自禪為王。

有一惡臣名曰耶利，白琉璃王：王本為皇子時，至舍夷國外家舍，看到佛精舍中，為諸釋種子所呵罵詈無有好醜。爾時，見敕「若我為王，便啟此事。」今時已到，兵馬興盛，宜當報怨。

即敕嚴駕，引率兵馬，往伐舍夷國。

佛有第二弟子名摩訶目犍連，見琉璃王引率兵士伐舍夷國以報宿怨。今當伐殺四輩弟子，念其可憐。便往到佛所，白佛言：今琉璃王攻舍夷國，我念中人當遭辛苦。我欲以四方便救舍夷國人：①舉舍夷國人著虛空中，②舉舍夷國人著大海中，③舉舍夷國人著兩鐵圍山間，④舉舍夷國人著他方大國中央，令琉璃王不知其處。

佛告目連：雖知卿有是智德能安處舍夷國人。萬物眾生，有七不可避。何謂為七？①生，②老，③病，④死，⑤罪，⑥福，⑦因緣。此七事，意雖欲避，不能得自在。如卿威神，可得作此。宿對罪負，不可得離。

於是，目連禮已便去，自以私意取舍夷國人知識檀越四五百人，盛著鉢中，舉著虛空星宿之際。

琉璃王伐舍夷國，殺三億人已，引軍還國。

於是，目連往到佛所，為佛作禮，自貢高曰：琉璃王伐舍夷國，弟子承佛威神，救舍夷國人四五百人，今在虛空，皆盡得脫。

佛告目連：卿為往看鉢中人不也？

曰：未往視之。

佛言：卿先往視鉢中人眾。

目連以道力下鉢，見中人皆死盡。於是，目連悵然悲泣，愍其辛苦，還白佛言：鉢中人者，今皆死盡。道德神力不能免彼宿對之罪。

佛告目連：有此七事，佛及眾聖神仙道士，隱形散體，皆不能免此七事。

於是，世尊即說偈言：

非空非海中 非隱山石間 莫能於此處 避免宿對殃
眾生有苦惱 不得免老死 唯有仁智者 不念人非惡

佛說是時，座上無央數人聞佛說無常法，皆共悲哀，念對難免，欣然得道，逮須陀洹證。

⑱ 刀仗品

※昔，有一國，名曰賢提。

時，有長老比丘，長病委頓，羸瘦垢穢。在賢提精舍中臥，無瞻視者。

佛將五百比丘，往至其所。使諸比丘傳共視之，為作糜粥。而諸比丘聞其臭處，皆共賤之。

佛使天帝釋取湯水，佛以金剛之手洗病比丘身體，地尋震動，霽然大明，莫不驚肅。

國王臣民天龍鬼神無央數人，往到佛所，稽首作禮。白佛言：佛為世尊，三界無比，道德已備。云何屈意洗此病瘦垢穢比丘？

佛告國王及眾會者：如來所以出現於世，正為此窮厄無護者耳。供養病瘦沙門道士及諸貧窮孤獨老人，其福無量、所願如意。譬五河流，福來如是。功德漸滿，會當得道。

王白佛言：今此比丘，宿有何罪，因病積年，療治不瘥？

佛告王曰：往昔有王，名曰惡行，治政嚴暴，使一多力五百，主令鞭人。

五百假王威怒，私作寒熱。若欲鞭人，責其價數。得物鞭輕，不得便重，舉國患之。

有一賢者，為人所誣，應當得鞭，報五百言：「吾是佛弟子，素無罪過，為人所枉，願小垂恕。」五百聞是佛弟子，輕手過鞭，無著身者。

五百壽終，墮地獄中，拷掠萬毒。罪滅復出，墮畜生中，恆被撻杖。五百餘世，罪畢為人，常嬰重病，痛不離身。

爾時，國王者，今調達是也。時，五百者，今此病比丘是也。時，賢者者，吾身是也。吾以前世為其所恕，鞭不著身。是故，世尊躬為洗之。

人作善惡，殃福隨身，雖更生死，不可得免。

於是，世尊即說偈言：

撻杖良善 妄讒無罪 其殃十倍 災卒無赦

生受酷痛 形體毀折 自然惱病 失意恍惚

人所誣者 或縣官厄 財產耗盡 親戚離別
舍宅所有 災火焚燒 死入地獄 如是為十

時，病比丘聞佛此偈及宿命事，自知本行，剋心自責，即於佛前所患除愈，身安意定，即得阿羅漢道。

賢提國王歡喜信解，尋受五戒，為清信士，沒命奉行，得須陀洹道。

※昔，佛在舍衛國祇樹給孤獨精舍中，為天人龍鬼說法。

東方有國，名鬱多羅波提。

昔，有婆羅門等五百人相率，欲詣恆水。岸邊有三祠神池，沐浴垢穢裸形求仙，如尼撻法。道由大澤，迷不得過，中道乏糧，遙望見一大樹，如有神氣，想有人居，馳趣樹下，了無所見。婆羅門等舉聲大哭，飢渴委厄，窮死斯澤。

樹神人現，問諸梵志：道士那來？今欲何行？

同聲答曰：欲詣神池澡浴望仙。今日飢渴，幸哀矜濟。

樹神即舉手，百味飲食從手流溢，給眾飯食，皆得飽滿。其餘食飲，足供道糧。

臨當別去，詣神請問：本行何德，致此巍巍？

神答梵志：吾本所居，在舍衛國。時，國大臣，名曰須達，飯佛眾僧，詣市買酪，無提酪者，左右顧視，倩我提之。往到精舍，使我斟酌。訖行澡水，儼然聽法，一切歡喜，稱善無量。時我奉齋，暮還不餐，婦怪問我：「不食，何恨？」答曰：「不恨也。吾行於市，見長者須達於園飯佛，我往持齋，齋名八關。」其婦瞋恚忿然言曰：「瞿曇亂俗，奚足採納？君毀遺則，禍從此興。」蹶迫不已，便共俱食。時，我爾夜年壽算盡，終於夜半，神來生此。為是愚婦敗我齋法，不卒其業，來生斯澤作此樹神。提酪之福，手出飲食。若終齋法，應生天上，封受自然。即為梵志，而說頌曰：

祠祀種禍根 日夜長枝條 唐苦敗身本 齋法度世仙

梵志聞偈，迷解信受。旋還舍衛，路由一國，國名拘藍尼，有長者，名曰美音，為人恩仁，眾人敬仰。梵志過宿，長者問曰：道士那來？今欲所至？

具陳彼澤樹神功德：欲詣舍衛，造須達所，攢採齋法，冀蒙得福。

美音喜踊，宿行所追，且自解暢，宣令宗室：誰能共行受齋戒法？

合五百人，僉然應命，本願相引，威儀嚴出，共詣舍衛。未至祇洹，道逢須達，遇而不識，顧問從者：此何丈夫？

對曰：須達也。

梵志眾等喜而追曰：吾願成矣。

求人得人，馳趣相見，同聲歎曰：樹神歎德，注仰虛心，具說所嗟，故來投託，冀示法齋。

住車答曰：所求大善！吾有尊師，號曰如來。眾祐，度脫人類。近在祇洹，可共親造。

即皆敬諾，恭肅進前，遙見如來，情喜難量，五體投地，退坐一面。皆共長跪白世尊曰：本初發家，欲至三池沐浴求仙，經由樹神所陳如此，是故投化，願示極靈。

於是，世尊因其所行，而說偈言：

雖裸剪髮	長服草衣	沐浴踞石	奈疑結何
不伐殺燒	亦不求勝	仁愛天下	所適無怨

五百梵志聞偈歡喜，皆作沙門，得應真道。美音宗等逮得法眼。

諸比丘白佛言：五百梵志及長者等本行何德，得道何速？

世尊告曰：過去久遠，時世有佛名曰迦葉，為諸弟子說法，當來五濁之時，時有梵志長者千人，同發是言：「令我遭見釋迦文佛。」

爾時，梵志者，今此等梵志是。爾時，長者，今美音等是。從是因緣，見我
便解。

比丘歡喜，作禮奉行。

⑪ 耄品

※昔，佛在舍衛國祇樹精舍。

食後，為天人、帝王、臣民、四輩弟子，說甘露法。

時，有遠方，長老婆羅門七人，來至佛所，稽首於地，叉手白佛言：吾等遠人，伏聞聖化，久當歸命，而多諸礙。今乃得來覲睹聖顏，願為弟子，得滅眾苦。

佛即受之，悉為沙門，即令七人共止一房。

然，此七人睹見世尊，尋得為道。不惟無常，共坐房中，但思世事，小語大笑，不計成敗，命曰促盡，不與人期，但共喜笑迷意三界。

佛以三達智知命欲盡，佛哀愍之，起至其房，而告之曰：卿等為道，當求度世，何為大笑也？一切眾生，以五事自恃。何謂為五？①恃怙年少，②恃怙端政，③恃怙多力，④恃怙財富，⑤恃怙貴姓。卿等七人小語大笑，為何所恃？於是，世尊即說偈言：

何喜何笑	念常熾然	深蔽幽冥	不如求定
見身形範	倚以為安	多想致病	豈知不真
老則色衰	病無光澤	皮緩肌縮	死命近促
身死神從	如御棄車	肉消骨散	身何可怙

佛說偈已，七比丘意解妄止，即於佛前得阿羅漢道。

※昔，佛在舍衛精舍，為諸天人帝王說法。

時，有婆羅門村五百餘家中，有五百年少婆羅門，修婆羅門術，為人憍慢，不敬長老，貢高自貴，以此為常。

五百梵志歎白議言：沙門瞿曇自稱為佛，三達權智，無敢共論者。吾等可共請來論議，事事詰問，知為何如。

即辦供具，往請佛來。佛與諸弟子往到梵志村中，坐畢行水，食訖澡手。

時，有長老梵志夫婦二人，於此村中共行乞丐。佛知其本大富無比，曾作大臣。佛即問諸年少梵志：汝等識長老婆羅門不？

皆言：曾識。

又問：本為何似也？

曰：本為大臣，財富無數。

今者，何故復行乞丐？

皆言：散用無道，是以守貧。

佛告諸婆羅門：世有四事，人不能行。行者得福，不致此貧。

何謂為四？①年盛力壯，慎莫憍慢。②年老精進，不貪姪姪。③有財珍寶，常念布施。④就師學問，聽受正言。

如此老公，不行四事，謂之有常，不計成敗。一旦離散，譬如老鵠，守此空

池，永無所獲。

於是，世尊即說偈言：

晝夜慢惰	老不止姪	有財不施	不受佛言
有此四蔽	為自侵欺	咄嗟老至	色變作耄
少時如意	老見蹈踐	不修梵行	又不富財
老如白鵠	守斯空池	既不守戒	又不積財
老羸氣竭	思故何逮	老如秋葉	行穢檻縷
命疾脫至	不容後悔		

佛告梵志：世有四時行道，得福得度，可免眾苦。何謂為四？①年少，有力勢時。②富貴，有財物時。③得遇三尊，好福田時。④當計萬物，憂離散時。行此四事，所願皆獲，必得道跡。

於是，世尊重說偈言：

命欲日夜盡	及時可勤力	世間諦非常	莫惑墮冥中
當學然意燈	自練求智慧	離垢勿染污	執燭觀道地

佛說是時，放大光明，照曜天地。五百年少梵志，因此心解，衣毛為豎。起禮佛足，白佛言：歸命世尊，願為弟子。

佛言：善來比丘！

即成沙門，得阿羅漢道。村人大小皆得道跡，莫不歡欣。

②0 愛身品

※昔，有一國，名多摩羅。

去城七里，有精舍。五百沙門常處其中，讀經行道。

有一長老比丘，名摩訶盧，為人闇塞。五百道人傳共教之，數年之中，不得一偈。眾共輕之，不將同會，常守精舍，敕令掃除。

後日，國王請諸道人入宮供養。摩訶盧比丘自念言：我生世間，闇塞如此，不知一偈，人所薄賤，用是活為？即持繩至後園中大樹下，欲自絞死。

佛以道眼遙見如是，化作樹神半身人，現而呵之曰：咄！咄！比丘！何為作此？

摩訶盧即具陳辛苦。

化神呵曰：勿得作是，且聽我言。往，迦葉佛時，卿作三藏沙門，有五百弟子。自以多智，輕慢眾人，吝惜經義，初不訓誨。是以世所生，諸根闇鈍。但當自責，何為自殘？

於是，世尊現神光像，即說偈言：

自愛身者	慎護所守	希望欲解	學正不寐
身為第一	當自勉學	利能誨人	不倦則智
學先自正	然後正人	調身入慧	必遷為上
身不能利	安能利人	心調體正	何願不至
本我所造	後我自受	為惡自更	如剛鑽珠

摩訶盧比丘見佛現身光像，悲喜悚慄，稽首佛足，思惟偈義，即入定意，尋在佛前逮得阿羅漢道，自識宿命無數世事，三藏眾經即貫在心。

佛語摩訶盧：著衣持鉢，就王宮食，在五百道人上坐。此諸道人是卿先世五百弟子，還為說法，令得道跡，并使國王明信罪福。

即受佛教，徑入宮裏，坐於上座。

眾人心恚，怪其所以。各護王意，不敢呵譴。念其愚冥，不曉達嚬，心為之疲。王便下食，手自斟酌，摩訶盧即為達嚬，音如雷震，清辭雨下。坐上道人驚怖自悔，皆得阿羅漢。為王說法，莫不解釋，群臣百官皆得須陀洹道。

※昔，佛在舍衛國。有五百婆羅門，常求佛便，欲誹謗之。

佛三達之智，普見人心，愍欲度之。其果未熟，因緣未到。一切罪福，欲來至時，自作因緣，而迎罪福。

此諸梵志，宿有微福，應當得度，福德牽之，自作方宜。

五百梵志自共議言：當使屠兒殺生，請佛及諸眾僧。佛必受請，讚歎屠兒，吾等便前而共譏之。

於是，屠兒為之請佛，佛即受請。

告屠兒言：果熟自墮，福熟自度。

屠兒還歸，供設飯食。

佛將諸弟子到屠兒村中，至檀越舍。

梵志大小皆共歡喜：今日乃得佛之便耳。若當讚檀越福德者，當以前後殺生

作罪，持用譏之。佛若當說其由來之罪者，當以今日之福難之。二宜之中，今日乃得佛便耳。

佛到即坐，行水下食。於是，世尊觀察眾心。應有度者，即出舌覆面舐耳，放大光明照一城內，即以梵聲說偈咒願：

如真人教 以道活身 愚者嫉之 見而為惡

行惡得惡 如種苦種

惡自受罪 善自受福 亦各須熟 彼不相代

習善得善 亦如種甜

佛說偈已，五百梵志意自開解，即前禮佛，五體投地，叉手白佛言：頑愚不及，未達聖訓。惟願愍育，得為沙門。

佛即聽受皆為沙門。

村人大小見佛變化，莫不歡欣，皆得道跡。稱之賢聖，無復屠兒之名。佛食畢訖，即還精舍。

②1

世俗品

※昔，有婆羅門國王，名多味寫。其王奉事異道九十六種。王忽一日，發於善心，欲大布施。如婆羅門法，積七寶如山持用布施。有來乞者，聽令自取。重一撮去，如是數日，其積不減。

佛知是王宿福應度，化作梵志往到其國。

王出相見，共相禮問起居。曰：何所求索？莫自疑難。

梵志答言：吾從遠來，欲乞珍寶持作舍宅。

王言：大善！自取重一撮去。

梵志取一撮。行七步，還著故處。

王問：何故不取？

梵志答曰：此纔足作舍廬耳。復當娶婦，俱不足用，是以不取。

王言：更取三撮。

梵志即取。行七步，復還著故處。

王問梵志：何以復爾？

答曰：此足娶婦。復無田地、奴婢、牛馬。計復不足，是以息意也。

王言：更取七撮。

梵志即取。行七步，復還著故處。

王言：復何意故？

梵志答言：若有男女，當復嫁娶，吉凶用費。計不足用，是以不取。

王言：盡以積寶，持用相上。

梵志受而捨去。

王甚怪之，重問意故？

梵志答曰：本來乞丐，欲用生活。諦念人命，處世無幾，萬物無常，旦夕難保。因緣遂重，憂苦日深，積寶如山，無益於己。貪欲規圖，唐自艱苦。不如息意，求無為道。是以不取。

王意開解，願奉明教。

於是，梵志現佛光相，踊住空中，為說偈言：

雖多積珍寶 聳高至於天 如是滿世間 不如見道跡
不善像如善 愛如似不愛 以苦為樂相 狂夫為所厭

於是，國王見佛光相遍照天地，又聞此偈，踊躍歡喜，王及群臣即受五戒，得須陀洹道。

②② 述佛品

※昔，佛在摩竭提界善勝道場元吉樹下，德力降魔。

坐自惟曰：甘露法鼓聞於三千。昔父王遣五人供養麻米，執侍有勞，功報應敘。此五人者，在波羅奈國。

於是，如來從樹下起，相好嚴儀，明暉天地，威神震動，見者喜悅，至波羅奈國。未至中道，逢一梵志名曰憂呼，辭親離家，求師學道，瞻睹尊妙，驚喜交集，下在道側，舉聲歎曰：威靈感人，儀雅挺特，本事何師，乃得斯容？

佛為憂呼而作頌曰：

八正覺自得 無離無所染 愛盡破欲網 自然無師受

我行無師保 志獨無伴侶 積一得作佛 從是通聖道

憂呼聞偈，悵惘不解，即問世尊瞿曇如行？

佛告梵志：欲詣波羅奈國，擊甘露法鼓，轉無上法輪。三界眾聖，未曾有轉

法輪遷人入泥洹，如我今者也。

憂呼大喜：善哉！善哉！如佛言者，願聞甘露如應說法。

梵志揖已，即便過去。未到師所，於道路宿，至其夜半，卒便命終。

佛以道眼，見其已終，愍傷之曰：世間愚癡，謂命有常。見佛捨去，而獨喪亡。法鼓震動，而獨不聞。甘露滅苦，而獨不嘗。展轉五道，生死彌長。經歷劫數，何時得度？

佛以慈愍，而說偈言：

見諦淨無穢 已度五道淵 佛出照世間 為除眾憂苦
得生人道難 生壽亦難得 世間有佛難 佛法難得聞
佛說此偈時，空中五百天人，聞偈歡忻，皆得須陀洹道。

②③ 安寧品

※昔，佛在羅閱祇。

東南三百里，有山民村五百餘家，為人剛強，難以導化，宿世福願，應蒙開度。

於是，世尊化作沙門，至村分衛。分衛畢竟，出於村外樹下坐定，入泥洹三昧，至于七日，不喘不息，不動不轉。

村人見之，謂為命終。共相謂曰：沙門已死，當共葬送。

各持束薪，就往燒之。火然薪盡，佛從坐起，現道神化，光明照曜，感動十方。現變畢訖，還坐樹下，容體靜安，怡悅如故。

村人大小，莫不驚懼。稽首謝曰：山民頑野，不識神人，妄以薪火，燒於未然。自惟獲罪重於太山，惟垂慈赦，不見咎怨。不審神人得無傷病乎？將無愁感乎？將無飢渴乎？將無熱惱乎？

於是，世尊和顏含笑，而說偈言：

我生已安 不慍於怨 眾人有怨 我行無怨

我生已安 不病於病 眾人有病 我行無病

我生已安 不感於憂 眾人有憂 我行無憂

我生已安 清淨無為 以樂為食 如光音天

我生已安 恬憺無事 彌薪團火 安能燒我

爾時，村中五百人聞說偈已，皆作沙門，得阿羅漢道。村人大小皆信三尊。佛與五百人飛還竹園。

賢者阿難見佛與得道者俱來，前白佛言：此諸比丘，有何異德，乃使世尊自往臨度？

佛告阿難：我未下為佛時，世有辟支佛常處是山，去村不遠，在一樹下，欲般泥洹，現道神德，便取滅度。村人持薪火就往燒之，斂取舍利，著寶瓶中，埋在山頂，各共求願：「願後得道，如是沙門滅度快樂也。」緣此福故，應當得道。是故，如來往度之耳。

佛說是時，天人無數皆得道跡。

※昔，佛在舍衛國精舍。

時，有四比丘坐於樹下，共相問言：一切世間，何者最苦？

一人言：天下之苦，無過姪欲。

一人言：世間之苦，無過瞋恚。

一人言：世間之苦，無過飢渴。

一人言：天下之苦，莫過驚怖。

共諍苦義，云云不止。佛知其言，往到其所，問諸比丘：屬論何事？即起作禮，具白所論。

佛言：比丘！汝等所論，不究苦義。天下之苦，莫過有身！飢渴、寒熱、瞋恚、驚怖、色欲怨禍，皆由於身。

夫身者眾苦之本，患禍之元，勞心極慮，憂畏萬端，三界蠕動，更相殘賊，吾我縛著，生死不息，皆由於身。

欲離世苦，當求寂滅，攝心守正，怕然無想，可得泥洹，此為最樂。

於是，世尊即說偈言：

熱無過姪 毒無過怒 苦無過身 樂無過滅

無樂小樂 小辯小慧 觀求大者 乃獲大安

我為世尊 長解無憂 正度三有 獨降眾魔

佛說偈已，告諸比丘：往昔久遠無數世時，有五通比丘，名精進力，在山中樹下閑寂求道。

時，有四禽依附左右，常得安隱：①鴿，②烏，③毒蛇，④鹿。是四禽者，晝行求食，暮則來還。四禽一夜自相問言：「世間之苦，何者為重？」

烏言：「飢渴最苦。飢渴之時，身羸日冥，神識不寧。投身羅網，不顧鋒刃。我等喪身，莫不由之。以此言之，飢渴為苦。」

鴿言：「姪欲最苦。色欲熾盛，無所顧念。危身滅命，莫不由之。」

毒蛇言：「瞋恚最苦。毒意一起，不避親疏。亦能殺人，復能自殺。」

鹿言：「驚怖最苦。我遊林野，心恆怵惕。畏懼獵師及諸豺狼，髣髴有聲，奔投坑岸。母子相捐，肝膽掉悸。以此言之，驚怖為苦。」

比丘聞之，即告之曰：「汝等所論，是其末耳，不究苦本。天下之苦，無過有身。身為苦器，憂畏無量。吾以是故，捨俗學道，滅意斷想，不貪四大，欲斷苦原，志存泥洹。泥洹道者，寂滅無形，憂患永畢，爾乃大安。」

四禽聞之，心即開解。

佛告比丘：爾時，五通比丘，則吾身是。時，四禽者，今汝四人是也。前世已聞苦本之義，如何今日，方復云爾？

比丘聞之，慚愧自責，即於佛前得阿羅漢道。

②4 好喜品

※昔，佛在舍衛精舍。

時，有四新學比丘，相將至柰樹下坐禪行道。柰花榮茂，色好且香。因相謂曰：世間萬物，何者可愛以快人情？

一人言：仲春之月，百木榮茂，遊戲原野，此最為樂。

一人言：宗親吉會，觴酌交錯，音樂歌舞，此最為樂。

一人言：多積財寶，所欲即得，車馬服飾與眾有異，出入光顯，行者矚目，此最為樂。

一人言：妻妾端正，綵服鮮明，香熏芬馥，恣意縱情，此最為樂。

佛知四人應可化度，而走意六欲，不惟無常。即呼四人，而問之曰：屬坐樹下，共論何事？

四人以實具白所樂。

佛告四人：汝等所論，盡是憂畏危亡之道，非是永安最樂之法也。

萬物春榮，秋冬衰落。宗親歡娛，皆當別離。財寶車馬，五家之分。妻妾美色，愛憎之主也。凡夫處世，興招怨禍，危身滅族憂畏無量，三塗八難，苦痛萬端，靡不由之矣。

是以，比丘捨世求道，志存無為，不貪榮利，自致泥洹，乃為最樂。於是，世尊即說偈言：

愛喜生憂	愛喜生畏	無所愛喜	何憂何畏
好樂生憂	好樂生畏	無所好樂	何憂何畏
貪欲生憂	貪欲生畏	解無貪欲	何憂何畏
貪法戒成	至誠知慚	行身近道	為眾所愛
欲態不出	思正乃語	心無貪愛	必截流度

佛告四比丘：昔有國王，名曰普安，與鄰國四王，共為親友。請此四王宴會一月，飲食娛樂，極歡無比。

臨別之日，普安王問四王曰：「人居世間，以何為樂？」

一王言：「遊戲為樂。」

一王言：「宗親吉會，音樂為樂。」

一王言：「多積財寶，所欲如意為樂。」

一王言：「愛欲恣情，此最為樂。」

普安王言：「卿等所論，是苦惱之本、憂畏之原。前樂後苦，憂悲萬端，皆由此興。不如寂靜，無求無欲，淡泊守一，得道為樂。」

四王聞之，歡喜信解。

佛告四比丘：爾時普安王者，我身是也。四王者，汝四人是也。前已說之，今故不解。生死荏蔓，何由休息？

時，四比丘重聞此義，慚愧悔過，心意開悟，滅意斷欲，得阿羅漢道。

㊥ 忿怒品

※昔，佛在羅閱祇耆闍崛山中。

時，調達與阿闍貫王共議毀佛及諸弟子。

王敕國人，不得奉佛。眾僧分衛，不得施與。

時，舍利弗、目連、迦葉、須菩提等，及波和提比丘尼等，各將弟子去到他

國。唯佛與五百阿羅漢住崛山中。

調達往至阿闍貫所與王議言：佛諸弟子今已迸散，尚有五百弟子在佛左右。願王明日請佛入城，吾當飲五百大象令醉。佛來入城，驅使醉象令踏殺之，盡斷其種。吾當作佛，教化世間。

阿闍貫王聞之歡喜，即到佛所，稽首作禮，白佛言：明日設薄施，願屈世尊及諸弟子於宮內食。

佛知其謀，答言：大善！明旦當往。

王退而去，還語調達：佛已受請，當合前計，飲象令醉，伺候待之。明日食時，佛與五百阿羅漢共入城門。

五百醉象鳴鼻而前，搪揆牆壁，樹木摧折，行人驚怖，一城戰慄。

五百阿羅漢飛在空中，獨有阿難在佛邊住，醉象齊頭徑前趣佛。

佛因舉手，五指應時化為五百師子王，同聲俱吼，震動天地。於是醉象屈膝伏地，不敢舉頭，酒醉尋解，垂淚悔過。王及臣民莫不驚肅。

世尊徐前至王殿上，與諸阿羅漢食訖咒願。

王白佛言：稟性不明，信彼讒言，興造逆惡，圖為不軌。願垂大慈，恕我迷愚。

於是，世尊告阿闍貫及諸大眾：世有八事興長誹謗，皆由名譽，又貪利養，以致大罪，累劫不息。

何等為八？利衰毀譽稱譏苦樂。自古至今，眇不為惑。

於是，世尊即說偈言：

人相謗毀 自古至今 既毀多言 又毀訥忍

亦毀中和 世無不毀 欲意非聖 不能折中

一毀一譽 但為名利

明智所譽 唯稱正賢 慧人守戒 無所譏謗

如羅漢淨 莫而誣謗 諸天咨嗟 梵釋所敬

佛說偈已，重告王曰：昔有國王，喜食鴈肉。常遣獵師張網捕鴈，日送一鴈以供王食。

時，有鴈王將五百鴈飛下求食，鴈王墮網，為獵師所得，餘鴈驚飛，徘徊不

去。

時，有一鴈連翻追隨，不避弓矢，悲鳴吐血，晝夜不息。

獵師見之，感憐其義，即放鴈王，令相隨去。群鴈得王，歡喜迴繞。

爾時，獵師具以聞王，王感其義，斷不捕鴈。

佛告阿闍貫王：爾時，鴈王者，我身是也。一鴈者，阿難是也。五百群鴈，今五百阿羅漢是也。食鴈國王者，今大王是也。時獵師者，今調達是也。前世已來，恆欲害我。我以大慈之力，因而得濟，不念怨惡，自致得佛。

佛說是時，王及群臣莫不開解。

②6 塵垢品

※昔，有一人，無有兄弟。為小兒時，父母憐愛，赤心慄慄，欲令成就。將詣師友，勸之書學。

其兒憍蹇，永不用心。朝受暮棄，初不誦習。如是積年，無所知識。

父母呼歸，令治家業。其兒憍誕，不念勤力。家道遂窮，眾事弛廢。其兒放縱，無所顧錄，糶賣家物，快心恣意，亂頭徒跣，衣服不淨，慳貪搪揆，不避

恥辱，愚癡自用，人所惡賤，國人咸憎，謂之凶惡。出入行步，無與語者。不自知惡，反咎眾人，上怨父母，次責師友，先祖神靈不肯祐助，使我賴帶，輒軻如此，不如事佛，可得其福。

即到佛所，為佛作禮，前白佛言：佛道寬弘，無所不容。願為弟子，乞蒙聽許。

佛告此人：夫欲求道，當行清淨行。汝齎俗垢入我道中，唐自去就，何所長益？不如歸家，孝事父母，誦習師教，沒命不忘。勤修居業，富樂無憂。以禮自將，不犯非宜。沐浴衣服，慎於言行，執心守一，所作事辦。改行清修，人所歎慕。如此之行，乃可為道耳。

於是，世尊即說偈言：

不誦為言垢 不勤為家垢 不嚴為色垢 放逸為事垢

慳為惠施垢 不善為行垢 今世亦後世 惡法為常垢

垢中之垢 莫甚於癡 學當捨此 比丘無垢

其人聞偈，自知僣癡。即承佛教，歡喜還歸。思惟偈義，改悔自新。孝事父

母，尊敬師長，誦習經道，勤修居業，奉戒自攝，非道不行。宗族稱孝，鄉黨稱悌，善名遐布，國內稱賢。

三年之後，還至佛所，五體作禮，懇惻自陳：尊教至真，得全形體。棄惡為善，上下蒙慶。願垂大慈，接度為道。

佛言：善哉！

鬚髮尋落，即成沙門。內思止觀，四諦正道，精進日登，得阿羅漢道。

②7 奉持品

※昔，有長老婆羅門，名薩遮尼犍，才明多智，國中第一。有五百弟子。

貢高自大，不顧天下，以鐵鑠鑠腹。人問其故，答曰：恐智溢出故也。

聞佛出世，道化明達，心懷妒嫉，寤寐不安。語諸弟子：吾聞瞿曇沙門自稱為佛，今當往問深妙之事。令其心悸，不知所陳。

即與弟子往到祇洹，列住門外。遙見世尊威光赫奕，如日初出，五情騰踊，喜懼交錯。於是徑前，為佛作禮，佛命就座。

坐訖。尼犍問佛言：何謂為道？何謂為智？何謂為長老？何謂為端正？何謂

為沙門？何謂為比丘？何謂為仁明？何謂為有道？何謂為奉戒？若能解答，願為弟子。

於是，世尊觀其所應，以偈答言：

常敏好學	正心以行	唯懷寶慧	是謂為道
所謂智者	不必辯言	無恐無懼	守善為智
所謂老者	不以年耆	形熟髮白	憊愚而已
謂懷諦法	順調慈仁	明達清潔	是為長老
所謂端正	非色如花	貪嫉虛飾	言行有違
謂能捨惡	根原已斷	慧而無恚	是謂端正
所謂沙門	不必除髮	妄語貪取	有欲如凡
謂能止惡	恢廓弘道	息心滅意	是謂沙門
所謂比丘	非特乞食	邪行望彼	稱名而已
謂捨罪業	淨修梵行	慧能破惡	是為比丘
所謂仁明	非口所言	用心不淨	外順而已

謂心無為 內行清虛 此彼寂滅 是為仁明
所謂有道 非救一物 普濟天下 無害為道
奉持法者 不以多言 雖素少聞 身依法行
守道不妄 是為奉法

薩遮尼犍及五百弟子，聞佛此偈，歡喜開解，棄捐貢高，皆作沙門。
尼犍一人發菩薩心，五百弟子皆得阿羅漢道。

②8 道行品

※昔，有婆羅門，年少出家學道，至年六十，不能得道。

婆羅門法，六十不得道，然後歸家娶婦為居。

生得一男，端正可愛。至年七歲，書學聰了，才辯出口，有踰人之操。卒得重病，一宿命終。

梵志憐惜，不能自勝。伏其屍上，氣絕復蘇，親族諫諭，強奪殯殮，埋著城外。

梵志自念：我今啼哭，計無所益。不如往至閻羅王所，乞索兒命。

於是，梵志沐浴齋戒，齎持花香，發舍而去。

所在問人：閻羅王所治處，為在何許？

展轉前行，行數千里，至深山中，見諸得道梵志，復問如前。

諸梵志問曰：卿問閻羅王所治處，欲求何等？

答言：我有一子，辯慧過人，近日卒亡，悲窮懊惱，不能自解。欲至閻羅王所，乞索兒命，還將歸家，養以備老。

諸梵志等愍其愚癡，即告之曰：閻羅王所治處，非是生人可得到也。當示卿方宜，從此西行四百餘里有大川，其中有城，此是諸天神案行世間停宿之城。閻羅王常以月八日案行，必過此城。卿持齋戒，往必見之。

梵志歡喜，奉教而去。到其川中見好城郭，宮殿屋宇如忉利天。梵志詣門，燒香翹腳咒願，求見閻羅王。

王敕門人問之。

梵志啟言：晚生一男，欲以備老。養育七歲，近日命終。惟願，大王！垂恩布施，還我兒命。

閻羅王言：大善！卿兒今在東園中戲，自往將去。

梵志即往，見兒與諸小兒共戲。即前抱之，向之啼泣曰：我晝夜念汝，食寐不甘。汝寧念父母辛苦以不？

小兒驚喚，逆呵之曰：癡騃老翁，不達道理。寄住須臾，名之為子。勿妄多言，不如早去。今我此間，自有父母，邂逅之間，唐自抱乎？

梵志悵然，悲泣而去。即自念言：我聞瞿曇沙門知人魂神變化之道，當往問之。

於是，梵志即還，來至佛所。

時，佛在舍衛祇洹為大眾說法。

梵志見佛，稽首作禮。具以本末向佛陳之：實是我兒，不肯見認，反謂我為「癡騃老翁，寄住須臾，認我為子。」永無父子之情，何緣乃爾？

佛告梵志：汝實愚癡！人死神去，便更受形。父母妻子，因緣會居。譬如寄客，起則離散。愚迷縛著，計為己有，憂悲苦惱，不識根本。沉溺生死，未央休息。唯有慧者，不貪恩愛，覺苦捨集，勤修經戒，滅除諸想，生死得盡。

於是，世尊即說偈言：

人榮妻子	不觀病法	死命卒至	如水湍驟
父子不救	餘親何望	命盡怙親	如盲守燈
慧解是意	可修經戒	仿行度世	一切除苦
遠離諸淵	如風卻雲	已滅思想	是為知見
智為世長	懽樂無為	如受正教	生死得盡

梵志聞偈，霏然意解，知命無常，妻子如客，稽首委質，願為沙門。

佛言：善哉！

鬚髮自落，法衣在身，即成比丘。思惟偈義，滅愛斷想，即於座上得阿羅漢道。

②9 廣衍品

※昔，佛在舍衛國說法教化。天龍鬼神、帝王人民三時往聽。

彼時國王，名波斯匿。為人憍慢，放恣情欲，目惑於色、耳亂於聲、鼻著馨香、口恣五味、身受細滑，食飲極美，初無厭足。食遂進多，恆苦飢虛。廚膳

不廢，以食為常。身體肥盛，乘輿不勝。臥起呼吸，但苦短氣。氣閉息絕，經時驚覺。坐臥呻吟，恆苦身重。不能轉側，以身為患，便敕嚴駕，往到佛所。侍者扶持，問訊卻坐，叉手，白佛言：世尊！違遠侍覲，諮受無階，不知何罪，身為自肥？不能自覺，何故使爾？每自患之，是以違替，不數禮覲。

佛告大王：人有五事，令人常肥：①數食，②喜眠，③憍樂，④無愁，⑤無事。是為五事，喜令人肥。若欲不肥，減食粗燥，然後乃瘦。

於是，世尊即說偈言：

人當有念意 每食知自少 從是痛用薄 節消而保壽

王聞此偈，歡喜無量。即呼廚士而告之曰：受誦此偈。若下食時先為我說，然後下食。

王辭還宮，廚士下食。輒便說偈，王聞偈喜。日減一匙，食轉減少，遂以身輕，即瘦如前。自見如此，歡欣念佛，即起步行，往到佛所，為佛作禮。佛命令坐，而問王曰：車馬人從，為所在也？何緣步行？

王喜白佛：前得佛教，奉行如法。今者身輕，世尊之力。是以步來，知為何

如。

佛告大王：世人如此，不知無常。長身情欲，不念為福。人死神去，留身墳塚。智者養神，愚者養身。若能解此，奉修聖教。

於是，世尊重說偈言：

人之無聞 老如特牛 但長肌肥 無有智慧

生死無聊 往來艱難 意倚貪身 更苦無端

慧人見苦 是以棄身 滅意斷欲 愛盡無生

王重聞偈，欣然意解，即發無上正真道意。聽者無數，皆得法眼。

③〇 地獄品

※昔，舍衛國，有婆羅門師，名富蘭迦葉。

與五百弟子相隨。國王人民，先共奉事。

佛初得道，與諸弟子從羅閱祇至舍衛國。身相顯赫，道教弘美。國王宮中率土人民莫不奉敬。

於是，富蘭迦葉起嫉妒意，欲毀世尊，獨望敬事。即將弟子見波斯匿王而自

陳曰：吾等長老先學，國之舊師。沙門瞿曇後出求道，實無神聖，自稱為佛。而王捨我，欲專奉之。今欲與佛角試道德，知誰為勝？勝者，王便終身奉之。王言：大善！王即嚴駕往到佛所，禮畢。白言：富蘭迦葉欲與世尊角盡道力現神變化。不審世尊為可爾不？

佛言：大佳。

結期七日，當角變化。王於城東，平廣好地，立二高座。高四十丈，七寶莊校，施設幢幡，整頓座席。二座中間相去二里，二部弟子各坐其下。國王群臣大眾雲集，欲觀二人角其神化。

於時，迦葉與諸弟子先到座所，登梯而上。

有鬼神王，名曰般師。見迦葉等虛妄嫉妒，即起大風，吹其高座。

坐具顛倒，幢幡飛揚，雨沙礫石，眼不得視。

世尊高座淡然不動。

佛與大眾庠序而來，方向高座，忽然已上，眾僧一切寂然次坐。

王及群臣加敬稽首，白佛言：願垂神化，厭伏邪見，并令國人明信正真。

於是，世尊即於座上，忽然不現，即昇虛空，奮大光明。東沒西現，四方亦爾。身出水火，上下交易。坐臥空中，十二變化。沒身不現，還在座上。天龍鬼神花香供養，讚善之聲震動天地。

富蘭迦葉自知無道，低頭慚愧，不敢舉目。

於是，金剛力士舉金剛杵，杵頭火出以擬迦葉：何以不現卿變化乎？

迦葉惶怖，投座而走，五百弟子奔波迸散。世尊威顏，容無欣感。還到祇樹給孤獨園，國王群臣歡喜辭退。

於是，富蘭迦葉與諸弟子受辱而去。

去至道中，逢一老優婆夷，字摩尼，逆罵之曰：卿等群愚，不自忖度，而欲與佛比拗道德，狂愚欺誑，不知羞恥。亦可不須持此面目行於世間也。

富蘭迦葉與諸弟子至江水邊，誑諸弟子：我今投水，必生梵天。若我不還，則知彼樂。

諸弟子待之不還，自共議言：師必上天，我何宜住？

一一投水，冀當隨師，不知罪牽，皆墮地獄。

後日，國王聞其如此，甚驚怪之。往到佛所，白佛言：富蘭迦葉師徒迷愚，何緣乃爾？

佛告王曰：富蘭迦葉師徒重罪有二：①三毒熾盛，自稱得道。②謗毀如來，欲望敬事。以此二罪應墮地獄，殃咎催逼，使其投河。身死神去，受苦無量。是以智者守攝其心，內不興惡，外罪不至。譬如邊城，與寇連接，守備牢固，無所畏懼，內人安隱，外寇不入，智者自護，亦復如是。

於是，世尊即說偈言：

妄證求賂 行已不正 怨譖良人 以枉治世

罪牽斯人 自投於坑

如備邊城 中外牢固 自守其心 非法不生

行缺致憂 令墮地獄

佛說偈已，重告王曰：乃往昔時，有二獼猴王，各主五百獼猴。一王起嫉妒意，欲殺一王，規圖獨治。便往共鬥，數數不如，羞慚退去。到大海邊海曲之中，有水聚沫，風吹積聚高數百丈。獼猴王愚癡，謂是雪山，語群輩言：「久

聞海中有雪山，其中快樂，甘果恣口，今日乃見。吾當先往行視，若審樂者，不能復還。若不樂者，當來語汝。」

於是上樹，盡力跳騰，投聚沫中，溺沒海底。餘者怪之不出，謂必大樂。一投中，斷群溺死。

佛告王曰：爾時，嫉妒獼猴王者，今富蘭迦葉是也。群輩者，今富蘭迦葉弟子五百人是也。彼一獼猴王者，我身是也。

富蘭迦葉前世坐懷嫉妒，為罪所牽，自投聚沫，絕群斷種。今復誹謗，盡投江河，罪對使然，累劫無限。

王聞信解，作禮而去。

※昔，有七比丘，入山學道，十二年中未能得道。

自共議言：學道甚難，毀形執節。不避寒苦，終身乞食。受辱難堪，道卒叵得。罪難可除，唐自勞苦。殞命山中，不如歸家，修立門戶，娶妻養子。廣為利業，快心樂意。安知後事？

於是，七人即起出山。佛遙知之，應當得度，不忍小苦，終墮地獄，甚可憐

傷。佛即化作沙門，往到谷口，逢七比丘。化人問曰：久承學道，何以來出？七人答言：學道勤苦，罪根難拔。分衛乞食，受辱難堪。又，此山中無供養者，瑣瑣積年，恆守儉約，唐自困苦，道不可得。且欲還家，廣求利業，大作資財，後老求道。

化沙門言：且止！且止！聽我所言。人命無常，旦不保夕。學道雖難，前苦後樂。居家艱難，億劫無息。妻息會止，願同安利，欲望求樂，不遭患難，是猶治病服毒，有增無損也。三界有形，皆有憂惱，唯有信戒，無放逸意，精進得道，眾苦永畢。

於是，化沙門現佛身相，光像巍巍，即說偈言：

學難捨罪難	居在家亦難	會止同利難	艱難無過有
比丘乞求難	何可不自勉	精進得自然	終無欲於人
有信則戒成	從戒多致寶	亦從得諧偶	在所見供養
一坐一處臥	一行不放恣	守一以正心	必樂居樹間

於是，七比丘見佛身相，又聞此偈。慚怖戰慄，五體投地，稽首佛足，攝心

悔過。作禮而去，還入山中，殞命精進，思惟偈義，守一正心，閑居寂滅，得阿羅漢道。

③1 象品

※昔者，羅雲未得道時，心性粗獷，言少誠信。

佛敕羅雲：汝到賢提精舍中住，守口攝意，勤修經戒。

羅雲奉教，作禮而去。住九十日，慚愧自悔，晝夜不息。

佛往見之。

羅雲歡喜，趣前禮佛，安施繩床，攝受震越。

佛踞繩床，告羅雲曰：澡盤取水，為吾洗足。

羅雲受教，為佛洗足。

洗足已訖。

佛語羅雲：汝見澡盤中洗足水不？

羅雲白佛：唯然見之。

佛語羅雲：此水可用食飲盥漱以不？

羅雲白言：不可復用。所以者何？此水本實清淨，今以洗足，受於塵垢。是以之故，不可復用。

佛語羅雲：汝亦如是。雖為吾子、國王之孫，捨世榮祿，得為沙門。不念精進攝身守口，三毒垢穢，充滿胸懷，亦如此水不可復用。

佛語羅雲：棄澡盤中水。

羅雲即棄。

佛語羅雲：澡盤雖空，可用盛飲食不耶？

白佛言：不可用。所以然者，用有澡盤之名，曾受不淨故。

佛語羅雲：汝亦如是。雖為沙門，口無誠信，心性剛強，不念精進，曾受惡名。亦如澡盤，不中盛食。

佛以足指撥卻澡盤。澡盤應時輪轉而走，自跳自墮，數返乃止。

佛語羅雲：汝寧惜澡盤恐破不？

羅雲白佛：洗足之器，賤價之物，意中雖惜，不大殷勤。

佛語羅雲：汝亦如是。雖為沙門，不攝身口，粗言惡說，多所中傷。眾所不

愛，智者不惜。身死神去，輪轉三塗。自生自死，苦惱無量。諸佛賢聖所不愛惜，亦如汝言「不惜澡盤」。

羅雲聞之，慚愧怖悸。

佛告羅雲：聽我說喻。昔有國王，有一大象，猛黠能戰，計其力勢，勝五百小象。其王興軍欲伐逆國，被象鐵鎧，象士御之，以雙矛戟繫象兩牙，復以二劍繫著兩耳，以曲刃刀繫象四腳，復以鐵棒繫著象尾，被象九兵皆使嚴利。象唯藏鼻，護不用鬥。象士歡喜，知象護身。所以者何？象鼻軟脆，中箭即死，是以不出鼻鬥耳。象鬥殊久，出鼻求劍。象士不樂，念此猛象，不惜身命，出鼻求劍，欲著鼻頭。王及群臣惜此大象，不復使鬥。

佛告羅雲：人犯九惡，唯當護口，如此大象，護鼻不鬥。所以然者，畏中箭死。人亦如是，所以護口，當畏三塗地獄苦痛。十惡盡犯，不護口者，如此大象，分喪身命，不計中箭，出鼻鬥耳。人亦如是，十惡盡犯，不惟三塗毒痛辛苦。若行十善，攝口身意，眾惡不犯，便可得道，長離三塗，無生死患。

於是，世尊即說偈言：

我如象鬥 不恐中箭 常以誠信 度無戒人

譬象調伏 可中王乘 調為尊人 乃受誠信

羅雲聞佛懇惻之誨，感激自勵剋骨不忘。精進和柔，懷忍如地，識想寂靜，得阿羅漢道。

※昔，佛在舍衛國祇樹精舍。為四部弟子、天龍鬼神、帝王臣民敷演大法。時，有長者居士名曰呵提曇，來詣佛所，為佛作禮，卻坐一面。

叉手長跪，白世尊曰：久承洪化，欽仰奉顏，逼私不獲，願垂慈恕。

世尊令坐，即問所從來，姓字為何？

長跪答曰：本居士種，字呵提曇。乃先王時，為王調象。

佛問居士：調象之法，有幾事乎？

答曰：常以三事用調大象。何謂為三？①剛鉤鉤口，著其羈絆。②減食，常令飢瘦。③捶杖，加其楚痛。以此三事，乃得調良。

又問：施此三事，何所攝治也？

曰：鐵鉤鉤口，以制強口。不與食飲，以制身獷。加捶杖者，以伏其心。正

爾，便調。

曰：作此伏者，為何所施用？

答曰：如是伏已，可中王乘，亦可令鬥。隨意前卻，無有罣礙。

又問居士：止有此法，復有其異？

答曰：調象之法，止如此耳。

佛告居士：但能調象，復能自調。

即曰：不審自調，其義云何？惟願，世尊！彰演未聞。

佛告居士：吾亦有三事，用調一切人，亦以自調，得至無為。①至誠，制御口業。②以慈貞，伏身剛強。③以智慧，滅意癡蓋。持是三事，度脫一切，離三惡道，自致無為，不遭生死憂悲苦惱。

於是，世尊即說偈言：

如象名護財	猛害難禁制	繫絆不與食	而猶暴逸象
本意為純行	及常行所安	悉捨降結使	如鉤制象調
樂道不放逸	能常自護心	是為拔身苦	如象出于陷

雖為常調 如彼新馳 亦最善象 不如自調
彼不能適 人所不至 唯自調者 能到調方

居士聞偈，喜慶難量，內情解釋，即得法眼。聽者無數，皆得道跡。

③2 愛欲品

※昔，佛在羅閱祇國耆闍崛山精舍之中，為天人龍鬼轉大法輪。

時，有一人捨家妻子，來至佛所，為佛作禮，求為沙門。

佛即受之，令作沙門。命令樹下坐，思惟道德。

比丘受教，便入深山，去精舍百餘里，獨坐樹間，思道三年。心不堅固，意欲退還，自念捨家求道勤苦，不如早歸見我妻子。作此念已，便起出山。

佛以聖達見此比丘，應當得道，愚故還歸。佛以神足化作沙門，便往逆之，道路相見。化人即問：所從來也？此地平坦，可共坐語。

於是，二人便坐息語。

即答化人：吾捨家妻子，來作沙門，處此深山，不能得道。與妻子別，不如本願，唐喪我命，勞而無獲。今欲悔還，見我妻子，快相娛樂，後更作計。

須臾之間，有老獼猴，久已遠離樹木之間，在無樹之處，於中生活。

化沙門問此比丘：是獼猴何故獨在平地，無有樹木，云何樂此？

比丘答化人言：我久見此獼猴，以二事故來住此耳。何等為二？①以妻子眷屬群多，不得飲食快樂恣口。②常晝夜上下樹木，腳底穿壞，不得寧息。以此二事，故捨樹木，來住是間。

二人語頃，復見獼猴走還上樹。

化沙門語比丘言：汝見獼猴還趣樹木不也？

答曰：見之。此獸愚癡，得離樹木、群從、憤鬧。不厭勞煩，而還入中。

化人復言：卿亦如是，與此獼猴復何異矣？卿本以二事故來入此山中。何等為二？①以妻婦舍宅為牢獄故。②以兒子眷屬為桎梏故。卿以是故來索求道，斷生死苦。方欲歸家，還著桎梏入牢獄中，恩愛戀慕，徑趣地獄。

化沙門即現相好丈六金色光明，普照感動一山。飛鳥走獸尋光而來，皆識宿命，心內悔過。

於是，世尊即說偈言：

如樹根深固 雖截猶復生 愛意不盡除 輒當還受苦
獼猴如離樹 得脫復趣樹 眾人亦如是 出獄復入獄
貪意為常流 習與憍慢并 思想猗姪欲 自覆無所見
一切意流衍 愛結如葛藤 唯慧分別見 能斷意根源
夫從愛潤澤 思想為滋蔓 愛欲深無底 老死是用增
比丘見佛光相炳著，又聞偈言，悚然戰慄。五體投地懺悔謝過，內自改責。即便卻息，數隨止觀。在於佛前，逮得應真。

諸天來聽，聞皆歡喜，散花供養，稱善無量。

※昔，羅閱祇南四千里有國，奉事梵志數千人。

時，國大旱，三年不雨，禱祠諸神，無所不遍。

王問梵志，問其所由。

諸梵志言：吾等當齋戒訖竟，當遣人與梵天相聞，問其災異。

王言：大善！齋戒所乏，願見告示。

諸梵志言：當得二十車薪酥蜜膏油花香旛蓋，金銀祭器，盡用須之。

王即辦送，出至城外，去城七里平廣之地。積薪如山，共相推獎。其有不惜身者，終生梵天。選得七人，當就火燒，遣至梵天。

七人受祭咒願訖，蹶使上薪，從下放火，當燒殺之。煙焰炯然，熱氣直至，七人惶懼，左右求救，無有救者。舉聲曰：三界之中，寧有大慈愍我厄者，願受自歸。

佛遙知之，尋聲往救，在虛空中，顯現相好。

七人見佛，悲喜跳踊：惟願自歸，救我痛熱。

於是，世尊即說偈言：

或多自歸 山川樹神 厝立圖像 禱祠求福

自歸如是 非吉非上 彼不能來 度汝眾苦

如有自歸 佛法僧眾 道德四諦 必見正慧

生死極苦 從諦得度 度世八難 斯除眾苦

自歸三尊 最吉最上 唯獨有是 度一切苦

佛說偈訖，尋聲火滅，七人獲安，心喜無量。

梵志國人莫不驚悚，仰瞻世尊光相赫奕。分身散體，東沒西現，存亡自由，身出水火，五色晃昱。眾人見之，五體歸命。

於是，七人從薪下出，悲喜交集，而說偈言：

見聖人快 得依附快 得離愚人 為善獨快

守正見快 互說法快 與世無諍 戒具常快

使賢居快 如親親會 近仁智者 多聞高遠

於是，七人說此偈已，及諸梵志，願為弟子。

佛即受之，皆為沙門，得阿羅漢道。

國王臣民咸各修道，天尋大雨，國豐民寧，道化興隆，莫不樂聞。

※昔，佛在舍衛國為天人說法。

時，城中有婆羅門長者，財富無數，為人慳貪，不好布施。食常閉門，不喜人客。若其食時，輒敕門士堅閉門戶，勿令有人妄入門裏。乞丐求索、沙門梵志，不能得入與其相見。

爾時，長者歛思美食，便敕其妻令作飯食。教殺肥雞薑椒和調，炙之令熟。

飲食飭飭，即時已辦。敕外閉門。

夫婦二人，坐一小兒，著聚中央，便共飲食。

父母取雞肉著兒口中，如是數過，初不有廢。

佛知此長者宿福應度，化作沙門，伺其坐食，現出坐前，咒願且言：多少布施，可得大富。

長者舉頭見化沙門，即罵之曰：汝為道士而無羞恥，室家坐食，何為搪揆？

沙門答曰：卿自愚癡，不知慚羞。今我乞士，何為慚羞？

長者問曰：吾及室家自相娛樂，何故慚羞？

沙門答曰：卿殺父妻母，供養怨家。不知慚羞，反謂「乞士何不慚羞」？於是，沙門即說偈言：

所生枝不絕 但用食貪欲 養怨益丘塚 愚人常汲汲

雖獄有鉤鑠 慧人不謂牢 愚見妻子飾 染著愛甚牢

慧說愛為獄 深固難得出 是故當斷棄 不親欲為安

長者聞偈，驚而問之：道人何故而說此語也？

道人答曰：案上雞者，是卿先世時父，以慳貪故，常生雞中，為卿所食。此小兒者，往昔作羅刹，卿作賈客大人乘船入海，每輒流墮羅刹國中，為羅刹所食。如是五百世壽盡，來生為卿作子，以卿餘罪未畢，故來欲相害耳。今是妻者，是卿先世時母，以恩愛深固故，今還與卿作婦。今卿愚癡，不識宿命，殺父養怨、以母為妻。五道生死，輪轉無際，周旋五道，誰能知者？唯有道士見此睹彼，愚者不知，豈不慚羞？

於是，長者慙然毛豎，如畏怖狀。

佛現威神，令識宿命。長者見佛，即識宿命，尋則懺悔謝佛，便受五戒。佛為說法，即得須陀洹道。

※昔，佛在舍衛國祇洹說法。

時，有年少比丘，入城分衛。見一年少女人，端正無比，心存色欲。迷結不解，遂便成病，食飲不下，顏色憔悴，委臥不起。

同學道人往問訊之：何所患苦？

年少比丘具說其意，欲壞道心，從彼愛欲。願不如意，愁結為病。

同學諫諭，不入其耳。便強扶持將至佛所，具以事狀啟白世尊。

佛告年少比丘：汝願易得耳，不足愁結也，吾當為汝方便解之。且起食飲。比丘聞之，坦然意喜，氣結便通。

於是，世尊將此比丘并與大眾，入舍衛城到好女舍。

好女已死，停屍三日，室家悲號，不忍埋藏，身體臭脹，不淨流出。

佛告比丘：汝所貪惑好女人者，今已如此。萬物無常變在呼吸，愚者觀外，不見其惡，纏綿罪網，以為快樂。

於是，世尊即說偈言：

見色心迷惑 不惟觀無常 愚以為美善 安知其非真

以姪樂自裹 譬如蠶作繭 智者能斷棄 不眇除眾苦

心念放逸者 見姪以為淨 恩愛意盛增 從是造牢獄

覺意滅姪者 常念欲不淨 從是出邪獄 能斷老死患

於是，年少比丘見此女人，死已三日，面色臃爛，其臭難近。又聞世尊清誨之偈，悵然意悟，自知迷謬。為佛作禮，叩頭悔過。佛授自歸，將還祇洹，沒

命精進，得阿羅漢道。

所將大眾無央數人，見色欲之穢，信無常之證。貪愛望止，亦得道跡。

※昔，佛在舍衛精舍，為天人龍鬼說法。

時，世有大長者，財富無數。有一息男，年十二三。父母命終，其兒年小，未知生活理家之事，泮散財物，數年便盡。久後行乞，猶不自供。

其父有親友長者，大富無數。一日見之，問其委曲。長者愍念，將歸經紀，以女配之，給與奴婢車馬，資財無數，更作屋宅，成立門戶。

為人懶惰，無有計校，不能生活，坐散財盡，日更飢困。

長者以其女故，更與資財，故復如前，遂至貧乏。

長者數餉，用之無道，念叵成就，欲奪其婦更嫁與人，宗家共議。

女竊聞之，還語其夫：我家群強，勢能奪卿，以卿不能生活故。卿當云何，欲作何計也？

其夫聞婦言，慚愧自念：是吾薄福，生失覆蓋，不習家計生活之法。今當失婦，乞丐如故。恩愛已行，貪欲情著，今當生別，情豈可勝？

思惟反覆，便興惡念，將婦入房，今欲與汝共死一處。即便刺婦還自刺害，夫婦俱死。奴婢驚走，往告長者。長者大小驚來看視，見其已然。棺殮遣送，如國常法。長者大小憂愁念女，不去須臾。聞佛在世教化說法，見者歡喜，忘憂除患。將家大小往到佛所，為佛作禮，卻坐一面。

佛問長者：為所從來？何以不樂，憂愁之色？

長者白言：居門不德，前嫁一女，值遇愚夫，不能生活。欲奪其婦，便殺婦及身，共死如此。遣送適還，過覲世尊。

佛告長者：貪欲瞋恚，世之常病。愚癡無智，患害之門。三界五道，由此墮淵，展轉生死，無央數劫，受苦萬端，猶尚不悔，豈況愚人能得識此！貪欲之毒，滅身滅族，害及眾生，何況夫婦！

於是，世尊即說偈言：

愚以貪自縛	不求度彼岸	貪為財愛故	害人亦自害
愛欲意為田	姪怒癡為種	故施度世者	得福無有量
伴少而貨多	商人怵惕懼	嗜欲賊害命	故慧不貪欲

爾時，長者聞佛說偈，欣然歡喜，忘憂除患。即於座上一切大小及諸聽者，破二十億惡，得須陀洹道。

※昔，佛在舍衛精舍中。為天龍鬼神、帝王臣民說法。

時，有遊蕩子二人，共為親友，常相追隨，一體無異。

二人共議：「欲作沙門」。即便相將，來至佛所，為佛作禮，長跪叉手。

白佛言：願欲作沙門，惟見聽許。

佛便受之，即作沙門。

佛令二人共止一房。二人共止，但念世間恩愛榮樂，更共咨嗟，情欲形體，說其姿媚，專著不捨。念不止息，不計無常污露不淨。以此鬱怫，病生於內。佛以慧眼知其想亂，走意於欲，放心不住，是以不度。

佛令一人行，便自化作一人入房。問之言：吾等所思意志不離，可共往觀，視其形體，知為何如？但空想念，疲勞無益。

二人相隨至婬女村。佛於村內化作一婬女人。共入其舍，而告之曰：吾等道人受佛禁戒，不犯身事。意欲觀女人形容，當雇直如法。

於是，化女即解瓔珞、香薰衣裳，裸形而立，臭處難近。二人觀之，具見汚露，化沙門即謂一人言：女人之好，但有脂粉芬薰眾花沐浴塗香，著眾雜色衣裳以覆汚露，強薰以香，欲以人觀。譬如革囊盛屎，有何可貪？

於是，化比丘即說偈言：

欲我知汝本 意以思想生 我不思想汝 則汝而不有
心可則為欲 何必獨五欲 速可絕五欲 是乃為勇力
無欲無所畏 恬惓無憂患 欲除使結解 是為長出淵
佛說偈已，現其光相。比丘見之，慚愧悔過，五體投地，為佛作禮，重為說法，欣然得解，便得阿羅漢。

一人行還，見伴顏姿欣悅於常，即問其伴，獨何如斯？即如事說佛之大慈，愍度如此，蒙世尊恩，得免眾苦。

於是，比丘重為說偈言：

晝夜念嗜欲 意走不念休 見女欲汚露 想滅則無憂
其伴比丘聞此偈已，便自思惟，斷欲滅想，即得法眼。

③③ 利養品

※昔，佛將諸弟子，至俱曇彌國美音精舍。為諸天人神龍說法。

時，彼國王名曰優填。有大夫人，執行仁愛，顯譽清潔。王珍其操，每私恭敬。聞佛來化，嚴駕共出，往至佛所，為佛作禮，卻坐常位。

佛為國王及夫人嫖女說無常苦空。人所由生，合會別離，怨憎會苦。由福生天、由惡入淵。

國王夫人歡欣信解，各受五戒，為清信士女，禮佛辭退，還入宮中。時，有婆羅門，名曰吉星。生一好女，世間少比，至年十六，無能訶者。懸金千兩，積九十日，募索智者：「有能訶此女為不端正者，以金與之。」無敢應者。

女以長大，應當嫁處。念當與誰：若有端正如我女者，以女與之。

聽聞沙門瞿曇釋迦之種，姿容金色，世所希有。當以此女，往配與之。

即便將至佛所，為佛作禮。白佛言：我女好潔，世間無雙，年大應嫁，世無匹偶。瞿曇端正，可以為雙，故遠將來，以配世尊。

佛告吉星：卿女端正，是卿家好。如我之好，是諸佛好。我之所好，其道不同。卿自譽女，端正姝好，譬如畫瓶，中盛屎尿。有何奇特？好為所在？著眼耳鼻口，身之大賊。面首端正，身之大患。破家滅族，殺親害子，皆由女色。吾為沙門，一身獨立，猶尚恐危，況受禍災、殘賊之貨也！卿自將去，吾不受之。

於是，梵志瞋恚便去。到優填王所，讚女姿媚，具白王言：此女應相，當為王妃。今以年大，故送與王。

王見歡喜，即納受之，拜為第二左夫人。即以印綬金銀珍寶賜與吉星，拜為輔臣。此女得敘，每協嫉妒，妖蠱迷王，數譖大夫人，如是非一。

王返辱曰：卿等妖媚，言返不遜，彼人操行可貴，而返譖之。

此女心忌，猶欲害之。數譖不已，王頗惑之。前後心謀，伺其齋時，因勸白王：今日之樂，宜請右夫人。

王便普召敕令皆會，大夫人持齋，獨不應命。反覆三呼，執齋不移。王怒隆盛，遣人拽出，縛著殿前，欲射殺之。夫人不怖，一心歸佛。王自射之，箭還

向王。後射輒還，數箭亦爾。

時，王大怖，自解，而問之曰：汝有何術，乃致如此？

夫人對曰：唯事如來，歸命三尊。朝奉佛齋，過中不餐，加行八事，飾不近身。必是世尊哀顧若茲。

王曰：善哉！豈可言不？

即出吉星女，還其父母。以大夫人正理宮內。

王與大夫人後宮太子，嚴駕群臣，往到佛所，作禮卻坐，叉手聽法。王即白佛，具以如事向佛陳之。

佛告大王：妖蠱女人，有八十四態。大態有八，慧人所惡。何謂為八？①嫉妒，②妄瞋，③罵詈，④咒詛，⑤鎮厭，⑥慳貪，⑦好飾，⑧含毒。是為八大態。

於是，世尊即說偈言：

天雨七寶	欲猶無厭	樂少苦多	覺之為賢
雖有天欲	慧捨不貪	樂離恩愛	為佛弟子

佛告大王：人行罪福，各有本性，所受影報，萬倍不同。若行六德，持齋福多，諸佛所譽，終生梵天，福樂自然。

佛說是時，王及夫人、嫫女、大臣，一切心解，皆得道跡。

③④ 沙門品

※昔，佛在舍衛國精舍之中。為天、龍、鬼神、國王、人民說法。

時，有一年少比丘，晨旦著衣服，拄杖持鉢，至大村中分衛。

時，大道邊有官菜園，外面種黍稷，其田外草中，施張發箭。若有蟲獸盜賊來者，觸網箭發，中箭則死。

有一端正年少女子獨守此園。

人欲往者，遙喚示道，乃得入園。不知道者，必為發箭所殺。

而此女子，獨守悲歌。其聲妖亮，聽者莫不頓車止馬，迴旋蹀躞而欲趣之。

盤桓不去，皆坐聲響。

時，此比丘分衛行還，道聞歌聲，側耳聽音，五情逸豫，心迷意亂，貪著不捨。想是女人必大端正，思想欲見，坐起言語，便旋往趣。未到中間，意志悅

惚，手失錫杖，肩失衣鉢，殊不自覺。

佛以三達見此比丘，小復前行為箭所殺。福應得道，為愚所迷，欲蓋所覆。憐愍其愚，欲度脫之。自化作白衣，往到其邊，以偈呵之曰：

沙門何行 如意不禁 步步著粘 但隨思走

袈裟被肩 為惡不損 行惡行者 斯墮惡道

截流自持 折心卻欲 人不割欲 一意猶走

為之為之 必強自制 捨家而懈 意猶復染

行懈緩者 誘意不除 非淨梵行 焉致大寶

不調難誠 如風枯樹 自作為身 曷不精進

說此偈已，即自復形，相好炳然，光照天地。若有見者，迷解亂止，各得其所。

比丘見佛，心意燿開，如冥闢明。即五體投地，為佛作禮，叩頭悔過，懺悔謝佛。內解止觀，即得阿羅漢，隨佛還精舍。聽者無數，皆得法眼。

③5

梵志品

※昔，私訶牒國中有大山，名私休遮他。

山中有梵志五百餘人，各達神通。自相謂曰：吾等所得，正是涅槃。佛始出世，初建法鼓，開甘露門。此等梵志，聞而不就。宿福應度，佛往就之，獨行無侶。到其路口，坐一樹下。三昧定意，放身光明，照一山中，狀如失火，山中盡燃。

梵志怖懼，咒水滅之。盡其神力，不能使滅。怪而捨走，從路出山。遙見世尊樹下坐禪，譬如日出金山之側，相好炳然如月星中。怪是何神，就而觀之。

佛命令坐，問所從來？

梵志對曰：止此山中，修道來久，旦欬火起，燒山樹木，怖而走出。

佛告梵志：此是福火，不傷損人，欲滅卿等癡結之垢。

梵志師徒顧相謂曰：是何道士也？九十六種未曾有此。

師曰：曾聞白淨王子名曰悉達，不樂聖位，出家求佛，將無是也？

徒等啟師：可共問佛。梵志所行事，為如法不也？

師徒之等共起白佛：梵志經法，名四無礙，天文地理，王者治國領民之法，

并九十六種道術所應行法，此經為是涅槃法不？願佛解說，開化未聞。

佛告梵志：善聽思之。吾從宿命無數劫來常行此經。亦得五通，移山住流，更歷生死，不可計數。既不得涅槃，亦復不聞有得道者。如汝等行非名梵志。

於是，世尊以偈報曰：

截流而渡	無欲如梵	知行已盡	是謂梵志
以無二法	清淨渡淵	諸欲結解	是謂梵志
非簇結髮	名為梵志	誠行法行	清白則賢
剔髮無慧	草衣何施	內不離著	外捨何益
去姪怒癡	憍慢諸惡	如蛇蛻皮	是謂梵志
斷絕世事	口無粗言	八道審諦	是謂梵志
已斷恩愛	離家無欲	愛著已盡	是謂梵志
離人聚處	不墮天聚	諸聚不歸	是為梵志
自識宿命	本所更來	生死得盡	叡通道玄
明如能默	是謂梵志		

佛說偈已，告諸梵志：汝等所修，自謂已達涅槃。如少水魚，豈有長樂？命本無者也。

梵志聞經，五情內發喜悅。長跪白佛：願為弟子。

頭髮自墮，即作沙門。本行清淨，因而得道，為阿羅漢。

天龍鬼神，皆得道跡。

③⑥ 泥洹品

※昔，佛在王舍城靈鷲山中。時，與諸比丘千二百五十人俱。

時，摩竭國王號名阿闍世，所領五百國，各有姓名。

近有一國，名曰越祇，不順王命，欲往伐之。

即召群臣講宣議曰：越祇國人，富樂熾盛，多出珍寶，不首伏於我。寧可起兵，往伐之不？

國有賢公丞相，名曰雨舍，對曰：唯然。

王告雨舍：佛去是不遠，聖哲三達，靡事不貫。汝持吾聲，往至佛所，如卿意智，委悉問之。欲往伐彼，寧得勝不？

丞相受教，即嚴車馬，往至精舍，前到佛所，頭面著地，為佛作禮。佛命令坐，公即就坐。佛問國丞相：從何所來？

公言：王使臣來，稽首佛足，問訊起居，餐食如常？

佛即問公：王及國土人民臣下，皆自平安不？

公言：國主及民，皆蒙佛恩。

公白佛言：王與越祇國有嫌，欲往伐之。於佛聖意，為可得勝不？

佛告丞相：是越祇國人民，奉行七法，不可勝之。王可諦思，勿妄舉動。

公即問佛：何等七法？

佛言：

越祇國人，數相聚會，講議正法，修福自守，以此為常。是謂為一。

越祇國人，君臣常和，所任忠良，教諫承用，不相違戾。是謂為二。

越祇國人，奉法相率，無取無捨，不敢犯過，上下循常。是謂為三。

越祇國人，禮化謹敬，男女有別，長幼相承，不失儀法。是謂為四。

越祇國人，孝養父母，遜悌師長，受誠教誨，以為國則。是謂為五。

越祇國人，承天則地，敬畏社稷，奉順四時，民農不廢。是謂為六。
越祇國人，尊道敬德，國有沙門得道應真、遠方來者，供養衣被床臥醫藥。
是謂為七。

夫為國主，行此七法，難可得危。極天下兵，共往攻之，不能得勝。
佛告丞相：若使越祇國人持一法者，尚不可攻，何況盡持如是七法！
於是，世尊即說偈言：

利勝不足恃 雖勝猶復苦 當自求勝法 已勝無所生
雨舍丞相聞佛說偈，即得道跡。時會大小，皆得須陀洹道。

公即從坐起，白佛言：國事煩多，欲還請辭。
佛言：可，宜知是時。

即從坐起，禮佛而去，還至具事白王，即止不攻。持佛嚴教，以化國內。
越祇國人即來順命，上下相奉，國遂興隆。

③⑦ 生死品

※昔，佛在舍衛國祇洹精舍。為天人國王大臣廣說妙法。

有一梵志長者，居在路側，財富無數。止有一子，其年二十。新為娶婦，未滿七日，夫婦相敬，言語相順。

婦語其夫：欲至後園中看戲，為得爾不？

上春三月，夫婦相將，至後園中。

有一柰樹，高大花好。婦欲得花，無人與取。

夫知婦意欲得柰花，即便上樹。正取一花，復欲得一。展轉上樹乃至細枝，枝折墮地，傷中即死。

居家大小奔波跳走，往趣兒所，呼天傷哭，斷絕復甦。中外宗族來者無數，皆甚悲痛。聞者莫不傷心，見者莫不痛哀，父母妻息怨咎天地，謂為不護。棺殮衣被，如法遣送，還家啼泣，不能自止。

於是世尊愍傷其愚，往問訊之。長者室家大小見佛，悲感作禮，具陳辛苦。佛語長者：止息聽法，萬物無常，不可久保，生則有死。罪福相追，此兒三處為其哭泣，懊惱斷絕，亦復難勝。竟為誰兒？何者為親？

於是，世尊即說偈言：

命如花果熟 常恐會零落 已生皆有苦 孰能致不死
從初樂愛欲 因姪入胞胎 受形命如電 晝夜流難止
是身為死物 精神無形法 假令死復生 罪福不敗亡
終始非一世 從癡愛久長 自作受苦樂 身死神不喪
長者聞偈，意解忘憂，長跪白佛：此兒宿命作何罪豐，盛美之壽而便中天？惟願解說本所行罪。

佛告長者：乃往昔時，有一小兒，持弓箭入神樹中戲。邊有三人亦在中看。樹上有雀，小兒欲射。三人勸言：「若能中雀者，世稱健兒。」小兒意美，引弓射之。中雀，即死墮地。三人共笑，助之歡喜，而各自去。經歷生死，無數劫中，所在相遭，共會受罪。其三人者，一人有福，今在天上。一人生海中，為化生龍王。一人今日，長者身是。此小兒者，前生天上，為天作子。命終來下，為長者作子。墮樹命絕，即生海中，為化生龍王作子，即以生日，化生金翅鳥王取而食之。今日三處，懊惱涕哭，寧可言也！以其前世，助其喜故。此三人者，報以涕哭。

於是，世尊即說偈言：

識神造三界 善不善五處 陰行而默至 所往如響應

欲色不色有 一切因宿行 如種隨本像 自然報如影

佛說偈已。欲使長者意解，即以道力示其宿命，皆見天上、龍中之事。

長者意解，欣然即起，長跪叉手，白佛言：願及大小為佛弟子，奉受五戒，為優婆塞。

佛即授戒，重為說法，無常之義。大小歡欣，皆得須陀洹道。

③⑧ 道利品

※昔，有國王治行正法，民慕其化。無有太子，以為愁憂。

佛來入國，便出覲尊，聽經歡欣，即受五戒。一心奉敬，唯願有子。晝夜精進，三時不懈。

有一給使，其年十一，常為王使，忠信奉法，不失威儀，謙卑忍辱，精進一心，學誦經偈。知時先起，已辦香火，數年之中，精進如是，不以為勞。卒得重病，遂致無常。

其神來還，為王作子。乳哺長大，至年十五，立為太子。

父王命終，襲代為王，憍慢自恣，姪洸欲樂，晝夜耽荒，不理國事。臣僚廢朝，民被其患。

佛知其行，不會本識。將諸弟子往到其國。

王聞佛來，如先王法，大眾奉迎，稽首于地，卻坐王位。

佛告王曰：國土人民群僚百官，悉自如常不？

王曰：為人年幼，未能綏化，皆蒙聖恩，國土無他。

佛告王曰：王今自知本所從來，作何功德得此王位？

王曰：不審。頑愚不達，不知先世所從來也。

佛告大王：本以五事得為國王。何等為五？

①布施。得為國王，萬民奉獻，宮觀殿堂資財無極。

②興立寺廟，供養三尊床榻幃帳。以是為王，在於正殿御座理國。

③親身禮敬三尊、及諸長德。以是為王，一切萬民莫不為之作禮。

④忍辱，身三口四及意無惡。以是為王，一切見者莫不歡欣。

⑤學問，常求智慧。以是為王，決斷國事，莫不奉用。行此五事，世世為王。

於是，世尊以偈頌曰：

人知奉其上 君父師道士 信戒施聞慧 終吉所生安

宿命有福慶 生世為人尊 以道安天下 奉法莫不從

王為臣民主 常以慈愛下 身率以法戒 示之以休咎

處安不忘危 慮明福轉厚 福德之反報 不問尊以卑

佛告王曰：王前世時，為大王給使，奉佛以信、奉法以淨、奉僧以敬、奉親以孝、奉君以忠。常行一心，精進布施。勞身苦體，初不懈倦。是福追身，得為王子，補王之榮。今者富貴，而反懈怠。

夫為國王，當行五事。何謂為五事？

①領理萬民，無有枉濫。

②養育將士，隨時廩與。

③念修本業，福德無絕。

④當信忠臣正直之諫，無受讒言以傷正直。

⑤節欲貪樂，心不放逸。

行此五事，名聞四海，福祿自來。捨此五事，眾綱不舉。

民困，則思亂。士勞，則勢不舉。無福，鬼神不助。自用，失大理，忠臣不敢諫。心逸，國不理。臣孽，民則怨。若如是者，身失令名，後則無福。

於是，世尊重說偈言：

夫為世間將 修正不阿枉 調心勝諸惡 如是為法王

見正能施惠 仁愛好利人 既利以平均 如是眾附親

佛說偈已。是時，王大歡喜，起住佛前，五體投地，懺悔謝佛，即受五戒。佛重說法，得須陀洹道。

※昔，佛在舍衛國祇樹精舍。為諸天人、國王大臣、四輩弟子說無上大法。

時，舍衛國南有深山，其中常出野象。象有三色，白青黑者。

國王欲得好名鬥大象，輒遣人往捕取將來。付調象師，三年之中便可乘騎，

亦可令鬥。

時，有一神象，龍之所生，身白如雪，尾赤如丹，兩牙如金色。

獵師見此非常好象，還白國王：有此大象，其形如是，宜大王乘。

王即募捕象師三十餘人，遣令捕此象。人眾往到象所，張罽欲捕象，而此神象知諸人意，即便來前而墮罽中，眾人皆來而欲捕之。象便瞋恚，逆躡跳之，近者即死，遠者得走，象逐不置。

時，山脅有諸年少道人，多力勇健，山中學道大久，未得定意，遙見此象追逐殺人。道人憐愍人故，自恃勇健，欲往救之。

佛已遙見，恐此比丘為神象所殺。佛即到象邊，放大光明。象見佛光，怒止恚解，不復追逐殺人。比丘見佛，逆為作禮。

佛為比丘即說偈言：

勿妄燒神象 以招苦病患 惡意為自殺 終不至善方

比丘聞偈，即便稽首，懺悔謝過，內自篤責，深惟為非。即於佛前，逮得應真。

時，捕象人即皆還穌。走者尋還，皆得道跡。

※昔，佛在羅閱祇耆闍崛山中。

時，國王瓶沙有一大臣，犯事免退，徙著南山中，去國千里外。由來無人，不熟五穀。大臣到中，泉水流溢，五穀大熟。四方諸國有飢寒者，皆來至此山中，數年之中，便有三四千家。來者給與田地，令得生活。

其中三老諸長宿年共議：國之無君，猶身之無首。

相將至大臣所，舉大臣為國王。

大臣答長老曰：若以我為王者，當如諸國王之法，左右大臣文武將士，上下朝直發女闥宮，租稅穀帛，當如民法。

諸國老曰：唯然奉命，一隨王法。

即立為王，處置群臣文武上下，發調人民，築城作舍宮殿樓觀。民被苦毒，不復堪諧，皆發想念，欲謀圖王。諸姦臣輩將王出獵，去城三四十里，於曠野澤中，牽王欲殺。

王問左右：何緣殺我？

答曰：民慕豐樂，奉王以禮。民困思亂，破家圖國。

王告之言：卿等自為，非我本造。枉殺我者，神祇知之。聽我發一願，死不有恨。

即願曰：我本開荒出穀養民，來者皆活，富樂無極。自共舉我，立為國王，依案諸國，自共作此。今反殺我，我實無惡於此人民。若我死者，願作羅刹，還入故身中，當報此怨。

於是絞殺棄屍而去。三日之後，王神即作羅刹，還入故身中，自名阿羅婆。即起入宮，絞殺新王，并及後宮嫔女左右姦臣，即皆殺之。羅刹瞋恚出宮，盡欲殺人。

國中三老草索自縛，來向羅刹自首：此是姦臣所為，非是細民所可能知。乞丐原恕，願還治國。

曰：我是羅刹，何與人等共從事也？食飲當得人肉，羅刹急性，忿不思難。三老曰：國是王許，故當如前，食飲所須，當相差次。

國老共出宣令人民皆共探籌，以此為次，家出一小兒，生用作食食羅刹王。三四千家正有一戶，為佛弟子，居門精進，五戒不犯，隨民探籌，得第一籌。

有一小兒，當先食鬼王。賢者大小懊惱啼哭，遙向崛山為佛作禮，悔過自責。

佛以道眼見其辛苦，便自說言：因是小兒，當度無數人。

便獨飛往至羅刹門，現變光相照其宮內。

羅刹見光，疑是異人，即出見佛，便起毒心，欲前噏佛。光刺其目，擔山吐火，皆化為塵，至久疲頓，然後降化。請佛入坐，頭面作禮。佛為說經，一心聽法，即受五戒為優婆塞。里吏催食，奪兒將來，室家嗥哭，隨道而來，觀者無數，為之悲哀。

吏抱兒擎食著羅刹前，羅刹即持此小兒擎食至佛前，長跪白佛言：國人相差次以小兒為食，我今受佛五戒，不復得食此小兒，請以小兒布施佛，為佛作給使。

佛為受之，即說咒願，羅刹歡喜，得須陀洹道。佛以小兒著鉢中擎出宮門，還其父母，而告之曰：快養小兒，勿復愁憂。

眾人見佛，莫不驚愕，怪是何神？此兒何福，而獨救之？羅刹所食，奪還父母。

於是，世尊在於大眾中央而說偈言：

戒德可恃怙 福報常隨己 見法為人長 終遠三惡道

戒慎除苦畏 福德三界尊 鬼龍邪毒害 不犯有戒人

佛說偈已，無央數人見佛光像，乃知至尊，三界無比，便皆歸化為佛弟子。聞偈歡欣，皆得道跡。

※昔，佛在波羅奈國鹿野場上。為天、人、龍、鬼、國王、臣民、不可計眾而為說法。

時，大國王太子將從小國王世子五百餘人，往到佛所，為佛作禮，卻坐一面而聽法。

諸太子等即白佛言：佛道清妙，玄遠難及，自古以來，頗有國王太子大臣長者之子，捨國吏民恩愛榮樂行作沙門者不？

佛告諸太子：世間國土，榮樂恩愛，如幻如化，如夢如響，卒來卒去，不可常保。

又，國王太子以三事故不能得道。何謂三事？

① 憍恣。不念學問佛經妙義，以濟神本。

② 貪取。不念布施下貧困厄群臣將士，所有財寶不與民共，以修財本。

③ 不能遠離色欲愛樂之事、捨棄牢獄憂煩之惱，行作沙門滅眾苦難，以修身本。

是以菩薩所生為王，除此三事，自致得佛。

又有三事，何謂為三？

① 少壯學問，領理國土，率化民庶，使行十善。

② 中以財施貧窮、孤寡、群臣將士，與民同歡。

③ 當計無常，命不久留，宜當出家行作沙門，斷苦因緣，勿更生死。

三事不施，獨無所得。

於是，世尊而自陳曰：昔我前世，作轉輪聖王，名曰南王皇帝，七寶導從，宮觀浴池，行宮戲園，及群臣、太子、夫人、嫫女、象馬廚宰，各八萬四千。有子千人，勇猛精銳。一人當千，飛行虛空。周遊四方，自在所為無當前者。其壽八萬四千歲，以法治政，不枉人民。

爾時，聖王歎自念言：「人命短促，無常難保，但當作福以求道真。念常布施世間人民，所有財物與民共之，已種福德。唯當出家行作沙門，斷絕貪欲，乃得滅苦。」

王即敕梳頭人：「若見頭髮白，便當啟我。」

至久數萬歲，梳頭人啟言：「白髮已生。」

敕令拔之舉著案上。王見白髮，涕泣命曰：「第一使者，忽然復至，今頭已白，宜當出家行作沙門，求自然道。」

擎髮掌中，自說偈言：

今我上體首 白生為被盜 已有天使召 時正宜出家

即召群臣，立太子為王。行作沙門，入山修道。畢人之壽，即生第二天上為天帝釋太子。

於後領理天下，亦如大王。復敕梳頭人：「若見白髮，便當啟我。」至久復啟：「白髮已生。」敕令拔之，擎著掌中，而說偈言：

今我上體首 白生為被盜 已有天使召 時正宜出家

復召群臣，立太子為王。即行作沙門，入山修道。畢人之壽，復生天上為天帝釋。

前天帝釋，畢天之壽，下生世間，為聖王作太子。此三聖王，更為父子。上為天帝，下為聖主，中為太子，各各三十六反，數千萬歲，終而復始，行此三事，自致得佛。

爾時，父者，今我身是也。太子者，舍利弗是也。王孫者，阿難是也。更相從生，展轉為王，以化天下，是以特尊，三界無比。

佛說是時。國王太子并諸太子皆大歡喜，受佛五戒為優婆塞，得須陀洹道。

③⑨ 吉祥品

※昔，佛在羅閱祇耆闍崛山中。為天人龍鬼轉三乘法輪。

時，山南恆水岸邊，有尼捷梵志，先出耆舊，博達多知，德向五通，明識古今。所養門徒有五百人，教化指授，皆悉通達天文地理星宿人情，無不瞻察。觀略內外，吉凶禍福，豐儉出沒，皆包知之。

梵志弟子先佛所行，應當得道，歛自相將至水岸邊，屏坐論語，自共相問：

世間諸國人民所行，以何等事為世吉祥？

徒等不了，往到師所，為師作禮，叉手白言：弟子等學久，所學已達，不聞諸國以何為吉祥？

尼捷告曰：善哉問也！閻浮利地，有十六大國，八萬四千小國。諸國各有吉祥，或金或銀，水精琉璃、明月神珠、象馬車輿、玉女珊瑚、珂貝妓樂、鳳凰孔雀，或以日月星辰、寶瓶四花、梵志道士，此是諸國之所好喜吉祥瑞應，若當見是，稱善無量，此是瑞應國之吉祥。

諸弟子曰：寧可更有殊特吉祥，於身有益、終生天上？

尼捷答曰：先師以來，未有過此，書籍不載。

諸弟子曰：近聞釋種，出家為道，端坐六年，降魔得佛，三達無礙，試共往問，所知博採，何如大師？

師徒弟子五百餘人，經涉山路往到佛所，為佛作禮。坐梵志位，叉手長跪。白佛世尊曰：諸國吉祥，所好如此。不審更有勝是者不？

佛告梵志：如卿所論世間之事，順則吉祥，反則凶禍，不能令人濟神度苦。

如我所聞吉祥之法，行者得福，永離三界，自致泥洹。

於是，世尊而作頌曰：

佛尊過諸天	如來常現義	有梵志道士	來問何吉祥
於是佛愍傷	為說真有要	已信樂正法	是為最吉祥
亦不從天人	希望求僥倖	亦不禱神祠	是為最吉祥
友賢擇善居	常先為福德	敕身承貞正	是為最吉祥
去惡從就善	避酒知自節	不姪於女色	是為最吉祥
多聞如戒行	法律精進學	修己無所爭	是為最吉祥
居孝事父母	治家養妻子	不為空乏行	是為最吉祥
不慢不自大	知足念反復	以時誦習經	是為最吉祥
所聞常欲忍	樂欲見沙門	每講輒聽受	是為最吉祥
持齋修梵行	常欲見賢明	依附明智者	是為最吉祥
已信有道德	正意向無疑	欲脫三惡道	是為最吉祥
等心行布施	奉諸得道者	亦敬諸天人	是為最吉祥

常欲離貪姪 愚癡瞋恚意 能習成道見 是為最吉祥
若以棄非務 能勤修道用 常事於可事 是為最吉祥
一切為天下 建立大慈意 修人安眾生 是為最吉祥
智者居世間 常習吉祥行 自致成慧見 是為最吉祥
梵志師徒聞佛說偈，欣然意解，甚大歡喜。前白佛言：甚妙！世尊！世所希有，由來迷惑，未及闡明。惟願，世尊！矜愍濟度，願身自歸佛法三尊，得作沙門，冀在下行。

佛言：大善！善來比丘！

即成沙門，內思安般，逮得應真。聽者無數，皆得法眼。

法句譬喻經

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

